

Yeisu Wasana Waiwaisana

Diyon

wana Leleli

Baaba Houwan

Buki ya ana toleleli heiya Diyon Sebedi natuna, iya apostolowau elulutega eluwa aвалиya etega. Nige sauga etega totona alana i lulumen buki ya elana, yaa totona bana te i ba, “Yeisu wana tohago toto i nunuwana-an nabiyān” (ololana 13:23; 19:26; 20:2; 21:7).

He puna ge Diyon buki ya i leli heiya te “nuku abulilek te Yeisu iya Mesaiya, Yehoba Natuna, ge wami abulilek o kaiwena iya alana elana yawalimiu hot nuku pwawa” (20:31). Buki ya elana ba kakanun hi gewi ta pwawal Yeisu kaiwena. Iya Baaba toto abatelipuna elana iyoho i gangan ge abwe i tabwa gamagal (1:1, 14). Iya Sipi Natuna toto Yehoba i patuna (1:29), iya aanan toto yawalila ni pem (6:35), iya wewel (7:37-38), iya panayawi ana mwananal (8:12; 9:5), iya sipi ali gana ana nog (10:7, 9), iya sipi ali tomatahikan waiwaisana (10:11, 14), iya lut al ge yawal (11:25), iya kamwasa, ba tunahot ge yawal (14:6), ge iya oine puna (15:1, 5).

Baaba I Tabwa Gamagal

1 ¹Mulaa abwe bugul gegewel hi gan, Baaba iyoho i gan, iya alona Yehoba, ge Baaba iya Yehoba.^a ²Abatelipuna elana iya iyoho alona Yehoba.

³Iya eliyana Yehoba bugul gegewena i ginolil. Binimala iya nigeaya, bugul bolo hi gan nige nihi gagan, yaa iya eliyana inoke hi masal.^b

⁴Iya elana yawal i gan, ge yawal o iya gamagalau wala mwananal.^c

^a 1:1 Diyo 17:5; 1Diy 1:1-2; Pan 19:13 ^b 1:3 1Kol 8:6; Kols 1:16-17; Hib 1:2

^c 1:4 Diyo 5:26

⁵Mwananal i yana gogou gamwanaa, yaa gogou mwananal o nige i aatena.^d

⁶Tau etega alana Diyon, iya Yehoba i patuna i nem panayawi.^e ⁷Iya i nem mwananal wasana i wasaan, inoke gamagalau gegewel wasa ya nihi hago ge nihi abulilek. ⁸Iya nige mwananal i oola, yaa i nem mwananal wasana i wasaan. ⁹Mwananal tutunahotina, toto mwananal ni pek gamagalau gegewel elal, iya i nem panayawi.^f

¹⁰I nem i minaa panayawi, yaa bwagana iya eliyana Yehoba panayawi i ginol, he panayawi gamagaliliyau nige hi aatena te henala iya. ¹¹I nem i minaa totona wana labi elana, yaa wana labi gamagaliliyau nige hi pwapwamwa pahe. ¹²Yaa bolo hi pwamwa heyang ge alana hi abulilekan, i talam bosowailiya nihi tabwa Yehoba natunau. ¹³Hi tabwa Yehoba natunau nige tage panayawi tamanina wana pamasal elana, o ebo gamagalau wali nuwatu elana, yaa Yehoba i ab pavavaluna-agil.^g

¹⁴Baaba i tabwa gamagal, inoke avala ta mina ga sauga kekeisi, mulolu ge baaba tutunahotina i kalaopopwi. Wana wasawasa ha kite, i ola Yehoba Natuna maisena ya wana wasawasa, i neem Tamana elana.

¹⁵Wasana Diyon Tobabitaiso i wasaan, i yogayoga i ba, “Toto ya heiya te bana ge valila ya ba, ‘Toto i nenem ewa iya i bwata lakeyau, kaiwena iya i gan houwa mulaa abwe ya masal.’” ¹⁶Iya mulolu i kalaopopwi, inoke gegewela wana mulolu ta pwawa i pem hikahikani. ¹⁷Yehoba Logugui i pek Mosese elana ge iya i pamasal gamagalau elal, yaa mulolu ge baaba tutunahotina i masalem Yeisu Keliso elana.^h ¹⁸Nige sauga etega gamagal etega Yehoba i kikite, yaa Yehoba Natuna maisena ya, iya i ola Yehoba, ge iya alona Tamana hi mitoyawa, iya yaka Yehoba i pankitela.ⁱ

Diyon Tobabitaiso Totona I Wasaan (*Mataiyo 3:1-12; Mak 1:1-8; Luke 3:1-18*)

¹⁹Yudiya wali tohouwa bolo Yelusalema, topowon enuna avaliyau ge un Libai enuna al hi patunal hi na Diyon elana hi nel hi ba, “Henala owa?”

²⁰Diyon nige i mimikekei, yaa analiya i lahe ge i ba bubun i ba, “Nau nige Mesaiya i oola.”

²¹Yaka hi neli al hi ba, “He binimala henala owa? Owa Ilaitiya?”

Diyon i ba, “Nau nige Ilaitiya i oola.”

Yudiya hi nel al hi ba, “Age owa palopita bwabwatana toto i nenem?”

Analiya i lahe i ba, “Nigeya.”^j

²²Yaka Yudiya hi ba, “He henala owa? Ga nu ba ola totom kaiwem? Nu ba pasapu eliyama, inoke naha na bolo hi patunama wali wasa naha pek bubun.”

^d 1:5 Diyo 3:19 ^e 1:6 Mat 3:1; Luke 1:13-17,76 ^f 1:9 Diyo 8:12 ^g 1:13 Diyo 3:3-6;
Pilp 2:7; Diyo 2:11; 1Pit 1:23 ^h 1:17 Tota 34:28; Loma 6:14 ⁱ 1:18 Tota 33:20; Diyo 6:46;
1Tim 6:16 ^j 1:21 Log 18:15,18; Mat 11:14

²³Diyon Yudiya analiya i lahe palopita Aiseya wana baaba elana i ba, “Nau toto i yogayoga uleya i ba, ‘Babala wana kamwasa ku pasapu.’”^k

²⁴Bolo Yudiya wali tohouwa hi patunal, gamwaliyaa enuna Palisi.

²⁵Heliya hi nel Diyon elana hi ba, “He hauna kaiwena ge u papababaitaiso, ebo owa nige Mesaiya, o Ilaitiya o ebo palopita toto bwabwatana i oola?”

²⁶Diyon analiya i lahe i ba, “Nau wewel elana ya papababaitaiso, yaa etega iyoho i talmilila gamwamiwa nige ku aatena. ²⁷Iya i nenem ewa, yaa nau nige no waisi i gagan ge tage aena ana os ana hihiu na sokal.”^l

²⁸Bugul gegewena ya i gana Bedani elana, wewel Yolidani labi leunati. He Diyon i papababaitaisowa wewel Yolidani elana.

Sipi Natuna Toto Yehoba I Patuna Bana

²⁹Hi kenu lan i gan, inoke Diyon matana i nok Yeisu i kite i nanawa elana, yaka i ba, “Ku kite! Iya Sipi Natuna toto Yehoba i patunam panayawi gamagaliliyau wali gegi ni ahok yoho!”^m ³⁰Iya te bana ge valila ya ba, “Tau toto i nenem ewa, iya i bwata lakeyau, kaiwena iya i gan houwa mulaa abwe ya masal.”ⁿ ³¹Saugena o nau nige ya aatena henala bana ya babaa, yaa ya nem gamagalau ya pababaitaisol wewel elana, puna heiya te iya na pamasal Isileli elal.”

³²⁻³³Inoke Diyon i wasa al i ba, “Nau valila nige ya aatena henala i nenem, yaa toto i patunau ge wewel elana gamagalau ya pababaitaisol i baem elau i ba, “Tau toto nu kite Yayaluwa Bwabwalena ni lau ge ni minaa elana, he iya te Yayaluwa Bwabwalena elana ni papababaitaiso.’ Inoke Yayaluwa Bwabwalena ya kite i loem labulabumwa i ola bunibuni ge i lau i minaa elana.”^o ³⁴Ya kiteya matawa, heiya te ya ba, “Tau ya iya Yehoba Natuna.”^p

Yeisu wana Tohago bolo I Pwawal Houwan

³⁵Lan i gan al, Diyon iyoho i taltalmilil al alonau ge wana tohago eluwa, ³⁶ge sauga Diyon Yeisu i kite i nanawa, inoke i ba, “Ku kite! Iya Sipi Natuna toto Yehoba i patunam!”^q

³⁷Sauga tohago ali toto eluwa hi hago Diyon baaba o i baunan, yaka hi tatauliulil Yeisu enaa. ³⁸Yeisu i tagena sikal i kitel, yaka i nelil i ba, “Hauna gun nuwamiu?”

Tohago hi ba, “Labai, ga u miminaa?” (Vilan “Labai” ana pasikal heiya “topankite.”)

³⁹Yeisu analiya i lahe i ba, “Ku nem yaka nuku kite.” Inoke avaliya Yeisu hi na wana abamina hi kite, ge lan o avaliya hi miminaa to. He sauga o iyaka po kilok kokoyavi ana labi elana.

^k 1:23 Ais 40:3 ^l 1:27 Diyo 1:15 ^m 1:29 Ais 53:6-7; 1Pit 1:18-19 ⁿ 1:30 Diyo 1:15
^o 1:32 Mat 3:16 ^p 1:34 Mat 3:17 ^q 1:36 Diyo 1:29

⁴⁰Bolo Diyon wana baaba hi hago ge hi tatauliulil Yeisu enaa, he etegana te Andulu, Saimon Pita talina.^r ⁴¹Inoke houwan hot Andulu i na talina Saimon i loyaan ge wana wasa i pek i ba, “Mesaiya iyaka ha pwawa.” (Vilan “Mesaiya” pana Gilik elana ana pasikal hi ba “Keliso,” ana sapu heiya “Yehoba wana hilihili gamagalina.”)

⁴²Yaka Andulu Saimon i en pwatanik Yeisu elana. Yeisu matana i nok Saimon i gayawaan, yaka i ba, “Owa Saimon, Diyon natuna, yaa alam ya tun Sipas.” (Alan “Sipas” ana pasikal pana Gilik elana hi ba “Pita,” ana sapu heiya “pat.”)^s

Pilipi Nataniyel wana Wasa I Pek Yeisu kaiwena

⁴³Lan i gan al, inoke Yeisu i nuwatu ni nok ni na Galili. Pilipi i pwawa ge i baik elana i ba, “U nem u toulilau.” ⁴⁴Pilipi wana panuwa te Betesaida, he panuwa o Andulu ge Pita al wali panuwa.

⁴⁵Pilipi Nataniyel i pwawa, yaka i baik elana i ba, “Tau toto wasana Mosese i lelelian Logugui ana buki elana, ge palopitau al hi lelelian, iyaka ha pwawa, iya Yeisu gagama Nasaleta, Yosepa natuna.”^t

⁴⁶Yaka Nataniyel i nel i ba, “Age bosowaina ya waisi etega ni neem Nasaleta?”

Yaka Pilipi i ba, “He u nem ga ta na u kite.”

⁴⁷Sauga Yeisu Nataniyel i kite i nanawa elana, yaka i ba, “Tau ya iya Isileli tutunahotina etega, ge nige kakawi etega i gagana elana.”

⁴⁸Inoke Nataniyel i nel Yeisu elana i ba, “Ga i ola ge u atenu?”

Yeisu i ba, “Ya kitewa u misiyu poga punaa, mulaa abwe Pilipi i yogaagiwa.”

⁴⁹Yaka Nataniyel i baik Yeisu elana i ba, “Topankite, owa Yehoba Natuna, ge owa Isileli wali kin!”^u

⁵⁰Yeisu i ba, “U abulilek kaiwena ya ba, ‘Ya kitewaa poga punaa.’ Toto ya nige i bwabwaya, yaa abwe bugul bwabwayal enuna nu kitel.” ⁵¹Yaka Yeisu i ba al i ba, “Ya ba tunahot eliyamiu, abwe nuku kite labulabum ni mwapwela ge Yehoba wana aneloseyau nihi haha ge nihi laulau Gamagal Natuna elana.”^v

Yeisu Wewel I Pil I Tabwa Oine

2 ¹Lan eluwa i mowasi, abwe alolon hagalena etega hi ginola Galili awanina Kena elana. Yeisu hinana i nok hagali o elana, ²ge Yeisu alonau wana tohago hi awanunil hi nok al alolon o elana. ³Sauga oine i mowasi, inoke Yeisu hinana i baik elana i ba, “Iyaka nige wali oine etega al i gagan.”

^r 1:40 Mat 4:18-20 ^s 1:42 Mat 16:18 ^t 1:45 Log 18:18; Ais 7:14; 9:6; Yel 23:5; Isik 34:23

^u 1:49 Mat 14:33; 16:16; Mak 3:11 ^v 1:51 Aba 28:12

⁴Inoke Yeisu hinana anana i lahe i ba, “Nevenak, hauna kaiwena baaba ya u baunan elau? No sauga nige ya ga i pwapwawa.”^w

⁵Yaka Yeisu hinana i baik totuwalali elal i ba, “Ebo hauna gun ni baunan eliyamiu, nuku ginol ola wana baaba.”

⁶Mulaa abwe Yudiya nihi anan, nimaliya ge wali bugubugul nihi ul ni ola wali tapwalolo ana logugui, inoke toto o kaiwena ulubwal pat elana hi ginoliliya ali gewi esiwa (6) iyoho to, maisena ge maisena bosowaina wewel ni minaa gamwanaa ana bwata ni ola 100 lita.^x

⁷Yaka Yeisu i baik totuwalali elal i ba, “Wewel ku wage ulubwal nuku pakalaopopwil.” Inoke wewel hi wage ge ulubwal hi pakalaopopwil i na ana siga awaliyaa.

⁸Yaka Yeisu i baik totuwalali elal i ba, “Sauga ya enuna ku wage ge ku na ku pek tau toto hagali i kauni elana.”

Yaka hi ginol i ola Yeisu wana baaba, ⁹ge tau toto hagali i kauni wewel toto Yeisu i pil ge i tabwa oine i im bose. Nige i aatena te oine o ga i noem, yaa totuwalali bolo wewel hi wage hi atena. Yaka tau toto hagali i kauni toalolon melutauina i yogaan i nok elana, ¹⁰ge i baik elana i ba, “Sauga gegewena oine amnana waiwaisana ta teli tagilan houwan, ge sauga gamagalau iyaka hi im nabiyon ge amnaliya i pwawa, inoke abwe oine toto nige amnana i wawaisi hot ta teli tagilan. Yaa owa nige u giginol ola. Oine amnana waiwaisana hot u kukuhikan ana siga sauga ya, abwe u teli tagilan.”

¹¹Ginol yawiyawi toto ya Yeisu wana ginol yawiyawi houwan hot, i ginola awan Kena elana labi Galili. Ginol o elana wana wasawasa i pamasal, inoke wana tohago hi abulilek-an.

Yeisu I Lopetaki Limi Bwabwalena elana

(Matayi 21:12-13; Mak 11:15-17; Luke 19:45-46)

¹²Alolon hagalena enaa, yaka Yeisu alonau hinana, talinau ge wana tohago hi nok hi na Kapenyama, inoke hi miminaa ga o lan enuna.^y

¹³Sauga iyaka kelaubwa Yudiya wali Nopalegi Hagalena ana sauga, inoke Yeisu i nok i na Yelusalema.^z ¹⁴Yeisu i na Limi Bwabwalena ana bakubakuwa, inoke gamagalau enuna i pwawal bulumakau, sipi ge bunibuni hi lolopalipali, ge enuna hi misiyo wali teibol elana ge mani hi lololopatal. ¹⁵Inoke hihiu enuna i ahe enibinibi i ginol, ge eliyana gamagalau avaliyau wali bulumakau ge sipi i takel tagilagil Limi Bwabwalena tolinaa, ge mani ana tololopatal wali teibol i kukupapagena-an ge wali mani i tagakayakaya-an, ¹⁶ge i baik bunibuni ali topalipali elal i ba, “Bugul bolo ya ku bugul egonagil! Bahi al Nam wana limi nuku

^w 2:4 Diyo 7:30; 8:20 ^x 2:6 Ta ba “ni ola 100 lita” o ebo ta ba “ni ola 25 galon.”

^y 2:12 Mat 4:13 ^z 2:13 Tota 12:1-27

giginol ni oola wami abamaketi!”¹⁷ Yaka tohago Buki Bwabwalena ana baaba hi nuwahikan, toto i ba, “Wam limi ana nunuwana i tau atewa i ola ginaha.”^a

¹⁸ Yaka Yudiya hi baik Yeisu elana hi ba, “He ginol yawiyawi etega u ginol naha kite, inoke naha atena tunahot Yehoba wam gasisi i pewa te ginol ya u ginol.”

¹⁹ Yeisu Yudiya analiya i lahe i ba, “Ebo Limi Bwabwalena ya nuku pasamwalekaleka, inoke lan eton elana na pamilil al.”^b

²⁰ Yudiya Yeisu anana hi lahe hi ba, “Baliman ana gewi poti sikis te limi ya hi taltali, yaa owa u ba, ‘Lan eton elana na pamilil al.’”²¹ Yaa Limi Bwabwalena toto bana ge Yeisu i babaa, he iya tuwana bana.^c ²² Inoke sauga i lutem yaomala, wana tohago wana baaba o hi nuwahikan, inoke Buki Bwabwalena ana baaba ge Yeisu wana baaba hi abulilek-an.^d

Gamagal wali Nuwatu Yeisu I Atena

²³ Sauga Yeisu iyoho Yelusalema Nopalegi Hagalena ana sauga elana, gamagalau hi gewi wana ginol yawiyawi i ginolil hi kite, inoke hi abulilek elana.^e ²⁴ Yaa Yeisu nige i oolak elal ge i memelteli-agil, kaiwena gamagalau gegewel wali nuwatu i atena. ²⁵ Nige tage wana aatena i kaubwa ge abwe gamagal etega wana wasa ni pek gamagalau wali nuwatu kaiwena, yaa i atena te hauna iyoho gamagalau ateliyaa.

Nikodimas I Na Yeisu elana

3 ¹ Tau etega Yudiya wali tohouwa etegana alana Nikodimas, iya boda Palisi gamagalina etega.^f ² Bulin etega i na Yeisu elana ge i ba, “Labai, ha atena owa topankite etega u neem Yehoba elana, kaiwena nige gamagal etega bosowaina ginol yawiyawi ni ginol ni ola owa, ebo Yehoba nige i miminek elana.”

³ Yeisu Nikodimas anana i lahe i ba, “Ya ba tunahot eliyam, nige bosowaina gamagal etega Yehoba wana abalogugui ni kite ana siga ebo Yehoba ni ab pavavaluna.”^g

⁴ Yaa Nikodimas i ba, “Ebo gamagal etega iyaka i matuwa, ga nihi ab ola-an? Nige bosowaina ni ulutuk sikal hinana tinenaa ge hinana ni ab paeluwana al.”

⁵ Yeisu Nikodimas anana i lahe i ba, “Ya ba tunahot eliyam, nige bosowaina gamagal etega ni ulutuk Yehoba wana abaloguguiya ana siga ebo Yehoba ni ab pavavaluna wewel ge Yayaluwa Bwabwalena elana.”^h ⁶ Gamagal tamana ge hinana tuwana hi ab yawalina i gan, yaa

^a 2:17 Same 69:9 ^b 2:19 Mat 26:61; 27:40 ^c 2:21 1Kol 6:19 ^d 2:22 Luke 24:6-8; Diyo 12:16 ^e 2:23 Diyo 7:31 ^f 3:1 Diyo 7:50; 19:39 ^g 3:3 Mat 18:3; 1Pit 1:23
^h 3:5 Isik 36:25-27

ebo Yayaluwa Bwabwalena gamagal o ni ab pavavaluna, inoke abwe yayaluwana yawalina ni gan.ⁱ ⁷Bahi atem ni yoyou no baaba kaiwena, toto ya ba, 'Ebo nuwamiu nuku ulutuk Yehoba wana abaloguguiya, he Yehoba ni ab pavavaluna-agimiu.' ⁸Mana i towa i yu olak labi toto nuwana ni noek. Butuna ta hago, yaa nige ta aatena te ga i yu noem ge ga i totowa noek. He Yayaluwa Bwabwalena wana tuwalali i ola ya to gamagalau gegewel bolo i ab pavavaluna-agil eliyalil."

⁹Yaka Nikodimas i nel al Yeisu elana i ba, "Baaba toto u baunan ga ni masal ola?"

¹⁰Yeisu i ba, "Owa Isileli wali topankite bwabwatana etega. He ga i ola ge no baaba ana sapu nige u aatena? ¹¹Ya ba tunahot eliyam, bugul toto ha atena te ha baunan, ge toto ha kite te ha wasaan, yaa komiu wama baaba nige ku aabulilek-an. ¹²Sauga ebo ya baaba bugul bolo hi masala panayawiya kaiweliya, yaka no baaba nige ku aabulilek-an. He ga abwe nuku abulilek ola ebo na baaba bugul bolo hi masala labulabumwa kaiweliya? ¹³Nige gamagal etega i haha labulabumwa, iyai ya te Gamagal Natuna, iya i loem labulabumwa. ¹⁴Mosese kopa i ahe mwata kakanununa i ginol ge i teli heyana suki elana uleya, he i ola ya te Gamagal Natuna abwe nihi teli heyana kolos elana,^j ¹⁵inoke gamagalau gegewel bolo hi abulilek elana yawaliliya hot nihi ahe."^k

¹⁶He Yehoba panayawi i nunuwana-an nabiyana, yaka Natuna maisena hot i talamwan, inoke henala ebo ni abulilek-an nige ni yayaomal, yawalina hot ni ahe.^l ¹⁷Yehoba Natuna i patuna i lau panayawiya, nige tage gamagalau panayawi ni pakotil, yaa ni pwamwalil.^m ¹⁸Gamagal toto i abulilek elana nige ana kot i gagan, yaa toto nige i aabulilek, iya ana kot i mowasi ge ana lahi hi baunan haba, kaiwena nige i aabulilek Yehoba Natuna maisena alana elana.ⁿ ¹⁹He yatala puna i ola hiwe: mwananal iyaka i nem i tuk panayawi, yaa gamagalau nuwaliya i noek gogou elana, mwananal nige nuwaliya i oola, kaiwena wali pagan i nak.^o ²⁰Bolo ginol nanakina hi awaawaginol, mwananal hi pihigelgel-an ge nige hi nonok mwananala, kaiwena nige nuwaliya i oola wali pagan nanakina mwananal ni pamasal. ²¹Yaa bolo wali ginol i sapu ge i tunahot hi nok mwananala, kaiwena nuwaliya ni mwananal te toto hi ginol hi ginola Yehoba wana gasisi elana.

Diyon Yeisu I Awa Bwatabwata-an

²²Yaka sauga etega Yeisu alonau ge wana tohago hi na labi Yudiya, inoke alonau hi miminek ga o, ge gamagalau i papababitaisol.^p ²³Diyon

ⁱ 3:6 Diyo 1:13 ^j 3:14 AlGe 21:9; Diyo 8:28; 12:32 ^k 3:15 Diyo 20:31 ^l 3:16 Diyo 3:36; 10:28; Loma 5:8; 8:32; 1Diy 4:9-10 ^m 3:17 Luke 19:10 ⁿ 3:18 Diyo 3:36; 5:24
^o 3:19 Diyo 1:5,9; 8:12 ^p 3:22 Diyo 4:1-2

Tobabitaiso al ge gamagalau i papababitaisol, iya iyoho Ainon awan Salim gegelinaa, kaiwena labi o elana wewel i bwata. Inoke gamagalau hi noknok elana ni pababitaisol. ²⁴He saugena o Diyon nigeiya ga hi teteli dela.

²⁵Diyon wana tohago enuna avaliya Yudiya etega hi peawabalgigil highig paganina kaiwena, hauna toto nihi toulil ge bosowailiya nihi sapu Yehoba matanaa. ²⁶Yaka tohago o hi nok hi na Diyon elana hi ba, “Topankite, tau toto valila alom wewel Yolidani labena leunati ge wasana u wasaan, he iya iyoho sauga e gamagalau i papababitaisol, ge gamagalau gegewel to hi noknok elana o.”

²⁷Analiya i lahe i ba, “Nige bosowaina bugul etega ni gan gamagal etega elana iyai te ebo Yehoba ni talamwan elana. ²⁸He komiu totomiu valila ku hago ya te ya ba, ‘Nau nige Mesaiya i oola, yaa Yehoba i patunau houwan Mesaiya awonaa.’^q ²⁹Toalolon melutauina iya te toalolon meluyovana i aahe, yaa toalolon melutauina wana heliyam i matamatan toalolon melutauina alona ge toalolon meluyovana nihi vin, inoke iya iyoho i lalaegan. Inoke sauga toalolon melutauina anana i hago, yaka i yaliyaya nabi. He nau no yaliyaya i ola to, ge no yaliyaya iyaka i olaolaek. ³⁰Iya alana ni bwatabwata ya, ge nau alau ni lolowa ya.”

Tau toto I Neem Labulabumwa Yehoba Anana I Baubaunan

³¹Tau toto i neem natiya, iya gamagalau gegewela i bwata lakela. Tau toto i neem panayawiya, iya panayawi gamagalina ge i baaba bugul bolo hi masamasal panayawiya kaiweliya. Yaa tau toto i neem labulabumwa, iya gamagalau gegewela i bwata lakela.^r ³²Iya bugul bolo i kitel ge i hagoem labulabumwa wasana i wasaan, yaa wana baaba nige gamagal etega i aabulilek-an.^s ³³Yaa henala ebo wana baaba ni abulilek-an, he iya iyaka i patunahot te Yehoba iya tobaaba tunahot. ³⁴Toto Yehoba i patuna iya Yehoba anana i baubaunan, kaiwena Yehoba Yayaluwana i pek elana i kalaopopwi. ³⁵Tamana Natuna i nunuwana-an ge bugul gegewena i teli nimanaa.^t ³⁶Henala ebo Yehoba Natuna ni abulilek-an, he iya yawalina hot iyaka i pwawa, yaa henala ebo Yehoba Natuna ni towani, yawal o nige ni pwapwawa, yaa Yehoba wana huga i minaa elana.^u

Yeisu alona ge Sameliya Yovana Hi Baaba Wewel kaiwena

4 ¹Palisi wasa hi hago te Yeisu iyaka gamagalau hi gewi i ahel i patohago-agil ge i pababitaisol, inoke wana tohago iyaka Diyon wana tohago hi gewi lakel.^v ²He Yeisu nige totona gamagal etega i papababitaiso, wana tohago ya te hi giginol. ³Sauga Yeisu i atena te iya

^q 3:28 Diyo 1:20; Mat 11:10 ^r 3:31 Diyo 8:23 ^s 3:32 Diyo 3:11 ^t 3:35 Mat 11:27; Diyo 5:20 ^u 3:36 Diyo 3:16-18; 1Diy 5:12 ^v 4:1 Diyo 3:22

wasana Palisi iyaka hi hago, yaka labi Yudiya i eguluwan ge i sikal al i na labi Galili.

⁴Kamwasa toto Yeisu i noek, labena Sameliya elana te i nosolaa, ⁵inoke i na i vin Sameliya awanina etega alana Saika. Awan o nige ana bwaga i yayapu bilibili toto Yakobo i pek natuna Yosepa elana.” ⁶Wewel kenken etega iyoho to valila Yakobo i ken. Nawanawa kaiwena Yeisu tuwana i aliga, inoke i misiyowa wewel kenken awana bebenaa. Sauga o iyaka i ola alalati bwagatau.

⁷⁻⁸Sauga o Yeisu wana tohago iyaka hi na panuwaa aanan nihi pwapwamola, inoke abwe Sameliya yovana etega i nok wewel wagi kaiwena. Yaka Yeisu i baek yova elana i ba, “Tab bosowaina wewel nu wage nu pem na im?”

⁹Sameliya yovana i baek Yeisu elana i ba, “Owa Yudiya gamagalina ge nau Sameliya yovana. He ga i ola ge u baem elau tage wewel na wage nu im?” Yova baaba o i baunan, kaiwena Yudiya nige avaliyau Sameliya hi heliheliyam.^x

¹⁰Yeisu yova anana i lahe i ba, “Binimala nu atena hauna toto Yehoba i guyauan, ge binimala nu atena henala nau ge wewel ya awanun elam, inoke nu awanun elau ge wewel yawalina gaganina na pewa.”^{y z}

¹¹Yaka yova i ba, “Tonowak, wewel kenken ya i milau, he nige wam ewagiwagi i gagan ge tage wewel nu wage. Wewel yawalina gaganina ga nu aheya? ¹²Age owa tubuma Yakobo u bwata lake? Iya wewel kenken ya i pem elama, ge iya alonau natunau, avaliyau wali sipi ge wali bulumakau, valila wewel kenken ya hi imwimwa.”^a

¹³Yeisu yova anana i lahe i ba, “Gamagalau gegewel bolo wewel ya hi im, abwe nihi walem al, ¹⁴yaa henala ebo wewel ni im toto nau na pek elana, he nige ni wawalem al. Wewel toto na pek elana ni tabwa wewel i bwanabwana pitpit ge yawal mihomihotina ni pek.”^b

¹⁵Yova i ba, “Tonowak, wewel toto o u pem na im, inoke bahi na wawalem al ge bahi na nenem wewel kenken ya elana wewel na wawagi al.”

¹⁶Yeisu i ba, “U na ga lagom u yogaan ge alom nuku nem.”

¹⁷Yova i ba, “Nige lagou i gagan.”

Yaka Yeisu yova anana i lahe i ba, “He tunahot te u ba, ‘Nige lagou i gagan.’ ¹⁸Valila u alolon panimala panuna, ge tau toto sauga ya alom ku mina nige lagom i oola. He ewasi u ba tunahot.”

w **4:5** Aba 33:19; Yos 24:32 x **4:9** Esil 4:1-5 y **4:10** Ta ba “wewel yawalina gaganina na pewa”, o ebo ta ba, “wewel toto yawalim ni pewa na pewa elam.” z **4:10** Diyo 7:37-38; Pan 21:6 a **4:12** Diyo 8:53 b **4:14** Diyo 6:35

¹⁹Yova i ba, “Tonowak, he iyaka ya atenawa age owa palopita etega.
²⁰Ama Sameliya tubumeyau oya ya elana te hi kukululu Yabowaine elana, yaa komiu Yudiya ku ba tage abatapwalolo iyai ya te Yelusalema.”^c

²¹Inoke Yesu i ba, “Yova, no baaba ya nu abulilek-an. Sauga i nenem gamagalau nihi kululu Tamaliya elana, yaa nige oya ya elana i oola o ebo Yelusalema elana. ²²Komiu Sameliya ku kululuek toto nige ku aatena elana; yaa ama Yudiya ha kululuek Yabowaine toto ha atena elana, kaiwena pwamwal ana aatena iyaka Yehoba i pamasala ama Yudiya eliyama.”^d ²³Yaa sauga i nenem ge iyaka i vin, inoke Yayaluwa Bwabwalena wana gasisi elana gamagalau nihi tapwalolo tunahot Tamaliya elana alona ge wali ginol tutunahotina. He totapwalolo lolal o heliya Tamala i loyaagil. ²⁴Yehoba iya yayaluwa, inoke bolo hi kululu elana Yayaluwa Bwabwalena wana gasisi elana te nihi tapwalolo, alona ge wali ginol tutunahotina.”^e

²⁵Yova i ba, “Ya atena te Mesaiya iyoho i nenem, ge sauga ebo ni nem, inoke abwe bugul gegewena ni pwamwananal eliyama.” (He “Mesaiya” pana Gilik elana ana pasikal hi ba “Keliso,” ana sapu heiya “Yehoba wana hilihili gamagalina.”)

²⁶Yesu anana i lahe i ba, “He nau te ya baaba elam e.”^f

Tohago Hi Sikal Yesu elana

²⁷Sauga o wana tohago hi sikal elana, ge ateliya i you kaiwena hi kite Yesu i baaba yova etega elana. Yaa nige etega tage ni nel yova elana ni ba, “Hauna nuwam?” o ebo ni nel Yesu elana ni ba, “Ga i ola ge u baaba yova elana?”

²⁸Yaka yova wana ulubwal i eguluwai ge etimwawa i sikal i na panuwaa. Inoke i baik gamagalau elal i ba, ²⁹“Ku nem ga gamagal etega ku kite, iya pagan gegewena bolo ya ginolil i baunan elau. Bi ola ge iya Mesaiya?” ³⁰Yaka gamagalau hi gewi panuwa hi eguluwai ge hi nowanik nihi na Yesu elana.

³¹Sauga yova i egon enaa, inoke tohago hi baik Yesu elana hi ba, “Topankite, aanan ga etega u an.”

³²Yaa analiya i lahe i ba, “Au i gan, toto komiu nige ku aatena.”

³³Yaka tohago hi pebaaba-agil hi ba, “Age gamagal etega aanan i pwatanim elana?”

³⁴Inoke Yesu i ba, “Au heiya te toto i patunau wana nuwatu na ginol ge wana tuwalali na pwamowasi.”^g ³⁵Komiu wami baaba etega ku ba ola hiwe: ‘Waikena esopali iyoho i mina yaka abwe lovetomwa ge pahi ana sauga.’ Yaa na baewa eliyamiu, matamiu ni nok eyowa ku kite! Enona

^c 4:20 Log 12:5-14; Same 122:1-5 ^d 4:22 2Kin 17:29-41; Ais 2:3; Loma 9:4-5

^e 4:24 2Kol 3:17; Loma 12:1; Pilp 3:3 ^f 4:26 Mak 14:61-62 ^g 4:34 Diyo 6:38

iyaka i matuwa ge bosowaina pahi.^h ³⁶Sauga e topahi molana i ahiahi, eyowa enona i pahipahi yawal mihomihotina kaiwena. Inoke togalauma ge topahi nihi yaliyaya pamaisena. ³⁷Baaba toto i ba, ‘Etega i galauma, ge etega al i pahi,’ he iyaka i tunahot i ola hiwe. ³⁸Sauga ya na patunamiu nuku nok nuku na eyowa toto valila nige ku tutuwalali-an enona nuku pahi. Gamagalau getogal eyowa hi tuwalali-an, ge komiu wali tuwalali enona ku pwawa.”

Sameliya Hi Gewi Hi Abulilek Yeisu elana

³⁹Sameliya awanina o elana gamagalau hi gewi Yeisu hi abulilek-an yova wana wasa kaiwena, toto i ba, “No pagan gegewena bolo ya ginolil i baunan elau.” ⁴⁰Inoke sauga hi na Yeisu elana, yaka hi awanun elana avaliya ga nihi minamina, inoke lan labui Yeisu i minaa ga awan o elana, ⁴¹ge gamagalau hi gewi al hi abulilek Yeisu wana panpankiti kaiwena.

⁴²Yaka gamagalau hi baek yova elana hi ba, “Nige tage wam baaba ya kaiwena ge ha abulilek, he iyaka totoma wana baaba ha hago ge ha atena tunahot tau ya iya panayawi ana Topwamwal.”ⁱ

Yeisu Gamaman ana Totuwalali Natuna I Pwamolu

⁴³Lan labui o i mowasi, yaka Yeisu labi Sameliya i eguluwai ge i nok i na labi Galili. ⁴⁴(He Yeisu iyaka i ba haba wana tohago elal i ba, “Palopita etega totona wana panuwa gamagaliliyau nige hi aawatauwana.”)^j ⁴⁵Sauga i na i vin Galili, yaka Galili gamagaliliyau Yeisu wana vin hi yaliyaya-an, kaiwena valila hi na Yelusalema Nopalegi Hagalena kaiwena ge wana ginol gegewena hi kite bolo i ginolil sauga o elana.^k

⁴⁶Yeisu i nok al i na Kena, Galili awanina, awan o elana valila wewel i pil ge i tabwa oine. Sauga o elana gamaman ana totuwalali bwabwatana etega natuna melutauina i kasiyebwa Kapenyama elana.^l ⁴⁷Sauga tau o Yeisu wasana i hago te iyaka i sikalem Yudiya ge i vin Galili, inoke i nok i na elana, ge i awanun ni nok ni na natuna ni pwamolu, kaiwena wawaya o ana kasiyebwa iyaka i pulowan.^m

⁴⁸Yeisu i baek elana i ba, “Ebo nige ginol yawiyawi ge abanuwa ahi nuku kikite, he nige nuku aabulilek.”ⁿ

⁴⁹Yaka gamaman ana totuwalali i ba, “Tonowak, u nem ga ta na natu u kite abwe mulaa ni aliga.”

⁵⁰Yeisu i baek elana i ba, “U sikal, natum nige ni aaliga.”

Tau o Yeisu wana baaba i abulilek-an inoke i egon.^o ⁵¹Iya iyoho ya i nawanawa kamwasaa, yaka wana totuwalali i pwawal ge wana wasa

^h 4:35 Luke 10:2 ⁱ 4:42 1Diy 4:14 ^j 4:44 Mat 13:57 ^k 4:45 Diyo 2:23

^l 4:46 Diyo 2:1-11 ^m 4:47 Mat 8:5-6 ⁿ 4:48 Diyo 2:18; 1Kol 1:22 ^o 4:50 Mat 8:13

hi pek hi ba, “Geman iyaka i molu.” ⁵²Inoke i nelil hauna kilok matana elana ge natuna tuwana i heluwan, yaka hi ba, “Nolu kokoyavi wan kilok te tuwana i heluwan ge i tultul.”

⁵³Inoke wawaya tamana i nuwatu nolu kilok matana toto o elana te Yeisu i baek elana i ba, “Natum nige ni aaliga.” Yaka tau o alonau ge wana limi ana heniheni gewel hi abulilek.

⁵⁴He ginol yawiyawi labuina to Yeisu i ginol sauga i sikalem Yudiya ge i na Galili.^p

Yeisu Tau Etega I Pwamoluwewel Betesada elana

5 ¹Sauga etega al, Yeisu i nok i na Yelusalema Yudiya wali tapwalolo hagalena etega kaiwena. ²Yelusalema ana abaulutuk etegana alana hi ba “Sipi ali Nog”. Wewel opop etega iyoho abaulutuk o labenaa, alana pana Hibilu hi ba Betesada. Gonu abaminamina ali gewi nimala panuna hi talil painan. ³⁻⁴Gonu o tokasiyebwa hi gewi wali abamina, bolo tomatakai, bolo aeliya i kom, ge bolo nige bosowailiya tuwaliya nihi palamwalamwaniu.^q ⁵Tau etega iyoho to i kasiyebwa baliman ana gewi teti eit. ⁶Yeisu tau o i kite i kenukenu, ge i atena sauga yayapona hot i kasiyebwa, yaka i neli i ba, “Tab nuwam nu molu?”

⁷Tokasiyebwa Yeisu anana i lahe i ba, “Tonowak, sauga wewel i nemunemu, nige o tolabe etega i gagan ge tage ni labeyau ge na gailau wewela. Sauga ebo ya lalabose tage na na na gailau wewela, he gamagal etega iyaka i gailau houwa.”

⁸Yaka Yeisu i baek tau elana i ba, “U lut, wam abakenu u ahe, ge u nawanawa.”^r ⁹Inoke sauga o i molu, i lut, wana abakenu i ahe, ge i nawanawa.

He lan Sabwata te bugul ya i gan. ¹⁰Inoke Yudiya wali tohouwa hi baek tau toto Yeisu i pwapwamoluwewel elana hi ba, “Lan Sabwata te lan e. Logugui i lopwali te lan Sabwata elana wam abakenu nu kalivai ge nu nawanawa.”^s

¹¹Yaka analiya i lahe i ba, “Tau toto i pwamolowau i ba, ‘Wam abakenu u ahe ge u nawanawa.’”

¹²Yaka Yudiya hi nel hi ba, “Hauna tau i baewa elam ge wam abakenu u ahe ge u nawanawa?” ¹³Tau toto abwe i molu nige i aatena henala ge i baek elana, kaiwena boda i bwata wewel labenaa ge Yeisu iyaka i lelisola gamwaliyaa.

P 4:54 Diyo 2:11 **q 5:3-4** Baaba enuna al i gan buki ana toleli papanet houhouwel enuna wali leleli elana. Baaba o i ola hiwe. “Heliya hi matamatan wewel ni nemunemu. He sauga ebo iyaka ana sauga, inoke Yehoba wana anelose etega ni lau ge wewel ni panemunemu. Sauga ebo wewel ni nemunemu, inoke tokasiyebwa toto ebo ni gailau houwa, yaka ana kasiyebwa ni mowasi ge ni molu.” **r 5:8** Mat 9:6 **s 5:10** Neh 13:19; Yel 17:21

¹⁴Yeisu abwe tau o i pwawaa Limi Tapwalolowa, ge i baek elana i ba, “U kite, iyaka u molu al. Wam gegi paganina nu paveyaho, eba abwe bugul nanakina hot etega ni gan al elam.”

¹⁵Yaka tau i egon i na Yudiya wali tohouwa wali wasa i pek i ba, “Age Yeisu te i pwamolowau.”

Yehoba Natuna Iya Toyatala ge Yawal Puna

¹⁶Yudiya Yeisu hi pihigelgel-an ge hi papalomwan-an, kaiwena Yeisu gamagalau i pwamolol Sabwata elana. ¹⁷Yaka Yeisu i baek elal i ba, “Nam iyoho sauga gegewena i tuwatuwalali, ge nau al ya tuwatuwalali.” ¹⁸Inoke Yudiya hi logasisi nabi nuwaliya Yeisu nihi lopaaliga. Nige tage Sabwata ana logugui ya te i leke, yaa Yehoba i awa tamani, he i ola te i ba iya alona Yehoba hi olaolaek.^t

¹⁹Yaka Yeisu i baek Yudiya elal i ba, “Ya ba tunahot eliyamiu, Yehoba Natuna nige bosowaina bugul etega totona ni ginol, yaa ginol toto i kiteya Tamana elana ya te bosowaina ni ginol. Ginol toto Tamana i giginol, he Natuna al i giginol.” ²⁰Tamana Natuna i nunuwana-an, ge ginol toto iya i giginol, gegewena i mimi panpankiti Natuna elana. Ginol toto sauga ya’ nige i bwabwata, yaa Tamana ginol bwabwatal hot ni pankite inoke ni awaawaginol, ge komiu nuwamiu nuku ahe. ²¹Kaiwena Tamana toyaomal i palutil ge yawaliliya i pek, inoke i ola al te Natuna yawal ni pek gamagalau bolo i hihilel elal. ²²Etega al, Tamana nige gamagal etega i papakot, yaa yatala ana logugui gegewena i pek Natuna elana,^w ²³nuwana gamagalau gegewel Natuna nihi awatauwan ni ola Tamana hi awatauwan. Henala ebo Natuna nige i aawatauwan, he Tamana, iya i patuna, nige i aawatauwan.”^x

²⁴Yeisu i ba al, “Ya ba tunahot eliyamiu, henala ebo no baaba ni hago ge toto i patunau ni abulilek-an, iya iyaka yawal hot i pwawa ge nige ni lalahi, he iyaka yaomal i tataluwan ge i na yawal hot elana.” ²⁵Ya ba tunahot eliyamiu, sauga iyoho i nenem—he iyaka i vin—inoke toyaomal Yehoba Natuna anana nihi hago, ge bolo ebo anana nihi hago, yawal hot nihi ahe. ²⁶Tamana iya yawal puna, inoke i ola al i talam Natuna iya yawal puna. ²⁷Iya Gamagal Natuna, inoke Tamana i teli iya gamagalau gegewel ali toyatala.

²⁸“Bahi atemi ni yoyou baaba ya kaiwena: sauga iyoho i nenem ge toyaomal bolo salaiya anana abwe nihi hago, ²⁹inoke nihi lutem ali salaiya. Bolo ginol waiwaisana hi ginol nihi lut yawal hot elana, ge bolo ginol nanakina hi ginol nihi lut lahi nihi pwawa.”^z ³⁰Nige bosowaina bugul etega na ginol totou no

^t 5:18 Mat 26:4; Diyo 7:1; 10:30 ^u 5:19 Diyo 5:30 ^v 5:20 “Ginol toto sauga ya,” he Yeisu tau toto i pwapwamolu bana. ^w 5:22 Diyo 5:27; Tuw 10:42 ^x 5:23 Pilp 2:10-11; 1Diy 2:23 ^y 5:24 Diyo 3:15-18 ^z 5:29 Dan 12:2; Mat 16:27; Tuw 24:15

nuwatu elana, yaa ya papayatala i ola ya te Nam i baem elau. No papakot i sapu ge i olaolaek, kaiwena nige ya lologasisi tage totou no nuwatu na ginol, yaa toto i patunau wana nuwatu na ginol.”^a

Yeisu Wasana ana Towasa Ona

³¹Yeisu i ba al, “Ebo totou wasau na wasaan, nasi nige ana abulilek ni gagan. ³²Yaa etega al iyoho^b wasau i wasawasa-an, ge ya atena baaba bolo i baunan kaiweu i tunahot.

³³“Valila gamagalau enuna ku patunal hi na Diyon Tobabitaiso elana, ge Diyon wasa tutunahotina i wasaan elal. ³⁴Nau nige ya nunuwatu tage gamagal etega ni wasa inoke no wasa ni labe ge ni patunahot, yaa Diyon wana wasa ya gopamasal kaiwena nuwau nuku abulilek ge mwal nuku pwawa. ³⁵Diyon iya i ola odam i tau ge i yana, inoke sauga kekeisi ya nuwamiu i noek mwananalina elana ge ku yaliyaya-an.

³⁶“Yaa no ginol ona hi wasaagau, ge wasa o Diyon wana wasa i bwata lake. Tuwalali bolo ya ginolil Nam i pem elau inoke ya awaawaginol, ge hi pamasalau te Nam i patunau.^c ³⁷Ge Nam toto i patunau, iya totona wasau i baubaunan. Yaa anana nige sauga etega ku hahago, ge maninina nige ku kikite.^d ³⁸Komiu wana baaba nige ku aahe ge ku aabulilek-an, kaiwena toto i patuna nige ku aabulilek elana. ³⁹Komiu Buki Bwabwalena ku vavasili ge ku nuwanuwatu-an, kaiwena ku nuwatu te ana baaba elana yawal hot nuku pwawa. He Buki Bwabwalena ana baaba bolo ya hi baaba nau kaiweu,^e ⁴⁰yaa komiu ku towaagau, nige ku nenem elau ge yawal hot ku aahe.

⁴¹“Nige ya nuwanuwatu gamagalau wali tobal kaiwena. ⁴²Yaa ya atenamiu; ya atena Yehoba ana nunuwana nige i gagan atemiwa. ⁴³Nam alana elana ya nem, yaka komiu ku towaagau, yaa ebo gamagal etega totona alana elana ni nem, he ku yaliyaya-an. ⁴⁴Nuwamiu te alomiyau nihi tobalagimiu, yaa nige ku lologasisi Yabowaine toto maisena hot ni tobalagimiu. He abwe ga nuku abulilek ola?

⁴⁵“Bahi nuku nunuwatu tage nau na wolemiu Nam elana. Mosese heiya te abwe ni wolemiu, yaa komiu ku nuwatu tage iya ami tolabe. ⁴⁶Binimala Mosese wana baaba nuku abulilek-an, inoke nau al nuku abulilek-agau, kaiwena wasau i lelelian.^f ⁴⁷Yaa kaiwena wana leleli nige ku aabulilek-an, he no baaba abwe ga nuku abulilek-an ola?”

Yeisu Boda I Paanil

(*Mataiyu 14:13-21; Mak 6:30-44; Luke 9:10-17*)

6 ¹Yaka abwe sauga etega Yeisu Hoga Galili (o ebo ta ba Hoga Taibeliyas) i alupanet-an i na labena etega. ²Inoke boda

^a 5:30 Diyo 5:19; 6:38 ^b 5:32 Yeisu i ba “etega al iyoho”, he Tamana bana.

^c 5:36 Diyo 3:2; 14:11 ^d 5:37 Mat 3:17; Diyo 5:32; 8:18 ^e 5:39 Luke 24:27

^f 5:46 Tuw 3:22

bwabwatana hi nodatu Yeisu hi noulil, kaiwena wana ginol yawiyawi toto tokasiyebwa hi gewi i pwamolol hi kite. ³Yeisu i na i ha oyaa ge alonau wana tohago hi misiyo. ⁴Sauga o, Yudiya wali Nopalegi Hagalena iyaka i kelaubwa.

⁵Yeisu matana i nok boda bwabwatana i kitel hi nenem elana, yaka i baek Pilipi elana i ba, “Nasi aanan ga ta pwamolaa ge gamagalau ya nihi an?” ⁶Yeisu i ba ola o, nuwana Pilipi ni labose, kaiwena iya iyaka i atena te hauna nasi i giginol.

⁷Pilipi Yeisu anana i lahe i ba, “Binimala ebo mani silba ali gewi tu handeled ta ahe ge beleid ta pwamolaya, he bwagana ta gotomwatomwan pakekeisi ge ta guyauan, yaa nasi nige bosowaina gegewel nihi pwawa.”

⁸Yeisu wana tohago etega alana Andulu, iya Saimon Pita talina, i ba masal i ba, ⁹“Geman etega hiwe, ana beleid toto bali hi ginoliya, ali gewi nimala panuna, ge ana moti kekeisi eluwa. Yaa gamagalau gegewel ya nasi nige bosowailiya!”

¹⁰Yaka Yeisu i ba wana tohago elal i ba, “Ku ba gamagalau nihi misiyoan.” He labena o elana mwawin i siun bubun, inoke gamagalau gegewel hi misiyoan mwawin pwatanaa, gamwaliyaa bolau ali gewi tabam paib tausan. ¹¹Inoke Yeisu beleid i ahel i ba mulolu Yehoba elana, yaka abwe i pek wana tohago elal ge hi guyauan gamagalau bolo hi misiyoan elal. Moti i ahel ge i ginol al i ola to. Inoke gamagalau hi anan ana siga ali luvi i pwawa.

¹²Sauga hi anan ge gegewel tineliya i kiya, yaka Yeisu i baek wana tohago elal i ba, “An teli gegewena ku bugul papahe, bahi etega ni nanak bwagabwaga.” ¹³Inoke an teli hi bugul papahe ge ana egowa elulutega eluwa hi usan pakalaopopwil, an teli o i neem beleid toto bali hi ahe hi ginoliya ali gewi nimala panuna elal.

¹⁴Inoke gamagalau bolo Yeisu wana ginol yawiyawi ya hi kite hi ba, “Tunahot iya palopita toto abwe i nenem panayawi.” ¹⁵Yeisu iyaka i atena te gamagalau nuwaliya nihi nok elana ge nihi palawakik ni tabwa wali kin, yaka maisena ya i egon i na i ha al oyaa.⁸

Yeisu I Nawaa Hoga Pwatanaa
(*Mataiyo 14:22-33; Mak 6:45-52*)

¹⁶Sauga i kokoyavi, Yeisu wana tohago hi na hi lau hoga Galili, ¹⁷hi gaiha wagaa, ge hi kuki nihi alupanet Kapenyama. Sauga bulin i gan, Yeisu nige ga i sisikal elal. ¹⁸Mana gasigasisena i towa ge hoga i bagol. ¹⁹Yaka hi levaleva ee ali bwaga ana yapu i ola paib o ebo sikis kilomita, abwe Yeisu hi kite i nawaa hoga pwatanaa i nenem wagaa, inoke hi

⁸ 6:15 Diyo 18:36

lovakun. ²⁰Yaa Yeisu i baek elal i ba, “Bahi lovakun, nau te.” ²¹Inoke alona wali yaliyaya Yeisu hi ahe i gaiha wagaa, yaka etimwawa waga i tuk labi toto nuwaliya nihi noek elana.

Yeisu ana Loya kaiwena Gamagalau Hi Na Kapenyama

²²Lan i gan al, inoke boda bolo hi eguluwagil hi minaa Hoga Galili labena etega, hi atena nolu waga maisena ya te i gan. Hi atena Yeisu nige alonau ge wana tohago hi gagaiha waga o elana, yaa tohago heliya ya hi kuki ge hi egon. ²³He waga enuna hi neem awan Taibeliyas hi tuk hi tana labi o gegelinaa, labi toto elana ge Babala beleid i ahe, i ba mulolu Yehoba elana, ge i pek boda hi an. ²⁴Sauga boda hi kite Yeisu nige i gagan to labi o elana, ge wana tohago al nige hi gagan, inoke hi gaiha waga elal ge hi lelipanet hi na Kapenyama Yeisu ana loya kaiwena.

Yeisu I Ba “Nau Aanan Yawalina Gaganina”

²⁵Sauga boda bolo o Hoga Galili hi alupanet-an hi na Kapenyama, inoke Yeisu hi pwawaa to. Yaka hi baek elana hi ba, “Topankite, hauna sauga u nem labi ya elana?”

²⁶Analiya Yeisu i lahe i ba, “Ya ba tunahot eliyamiu, nige tage ginol yawiyawi bolo ya ginolil ku kite ge kaiwena ku loyaagau, yaa beleid ya pewa ku an ge tinemi u i kiya kaiwena te ku loyaagau. ²⁷Bahi nuku logasisi aanan toto abwe ni nak kaiwena. Yaa nuku logasisi aanan toto i mimihot ge ana abapwamowasi yawal mihomihotina, aanan o Gamagal Natuna ni pewa eliyamiu. He Tamana Yehoba iyaka i pamasal te iya i awa wawaisi-an.”^h

²⁸Yaka boda hi baek Yeisu elana hi ba, “Ga naha ginol ola ge tuwalali bolo Yehoba nuwana naha ginolil?”

²⁹Analiya i lahe i ba, “Tuwalali toto Yehoba nuwana i ola hiwe: toto iya i patuna nuku abulilek-an.”ⁱ

³⁰⁻³¹Yaka gamagalau hi baek Yeisu elana hi ba, “Ginol yawiyawi etega u ginol, inoke naha kite ge naha abulilek-agiwa. Tubumeyau valila aanan toto manna hi an uleya, i ola Buki Bwabwalena ana baaba i ba: ‘Aanan i loem labulabumwa i pek hi an.’ He hauna gun owa nasi nu ginol?”^{j k}

³²Yaka Yeisu i baek elal i ba, “Ya ba tunahot eliyamiu, nige tage Mosese aanan i loem labulabumwa iyaka i pewa, yaa Nam aanan i loem labulabumwa tutunahotina sauga ya i pewa eliyamiu. ³³He aanan toto Yehoba i pewa i loem labulabumwa ge yawal hot i pek gamagalau panayawi elal.”

³⁴Yaka hi ba, “Tonowak, aanan ya sauga gegewena nu pem naha anan.”

^h 6:27 Diyo 6:48-58 ⁱ 6:29 1Diy 3:23 ^j 6:30 Mat 16:1; Diyo 2:18 ^k 6:31 Tota 16:14-15; AlGe 11:7-9; Same 78:24

³⁵Yeisu i baek elal i ba, “He nau aanan toto yawalimiu ni pewa. Toto ebo ni nem elau nige ni gagalebu, ge toto ebo ni abulilek-agau nige sauga etega ni wawalem al.^l ³⁶Yaa i ola te ya ba haba eliyamiu: iyaka ku kiteyau, yaa nige ku aabulilek-agau. ³⁷Gamagalau bolo Nam ni pem eliyau, gegewel nihi nem elau, ge sauga nihi nem, nige etegana na papatuna owaowani. ³⁸Kaiwena nau ya loem labulabumwa ge toto i patunau wana nuwatu na ginol, nige nau totou no nuwatu i oola. ³⁹Toto i patunau wana nuwatu te bolo gegewel i pem elau bahi etega na papayaomal, yaa lan mowamowasena elana na palutil yaomal elana.^m ⁴⁰Kaiwena Nam wana nuwatu te gamagalau gegewel bolo mataliya i nok Natuna hi kite ge hi abulilek-an, yawaliliya mihomihotina nihi ahe ge lan mowamowasena elana na palutil yaomal elana.”

⁴¹Yudiya Yeisu anana hi hago i ba, “Nau aanan toto i loem labulabumwa,” inoke baaba ya kaiwena heliya ya hi loba kaiwena. ⁴²Hi ba, “Tau ya iya Yeisu, Yosepa natuna. Tamana ge hinana ta atenal ya. He ga i ola ge i ba, ‘Nau ya loem labulabumwa?’”ⁿ

⁴³Yeisu i baek elal i ba, “Ku bakuhu, bahi loloba gamwamiwa. ⁴⁴Nige etega bosowaina ni nem elau ebo Nam toto i patunau nige ni nunul pwtanim elau, inoke lan mowamowasena elana na palutem yaomala.^o ⁴⁵Palopitau hi leleli hi ba, ‘Gegewel Yehoba ni pankitel.’ Inoke bolo Nam wana baaba hi hago ge wali aatena hi aheya elana, he gegewel nihi nem elau.^p ⁴⁶Yaa nige tage gamagal etega Nam i kite, yaa toto i neem Yehoba elana, he iya ya te i kite.^q ⁴⁷Ya ba tunahot eliyamiu, toto ebo ni abulilek-agau, he iya yawalina hot iyaka i ahe.^r ⁴⁸He nau aanan toto yawalimiu ni pewa.^s ⁴⁹Tubumiyau aanan toto manna hi an uleya, yaa iyaka hi aliga. ⁵⁰Yaa aanan toto i loem labulabumwa, gamagal toto ebo ni an nige ni aaliga. ⁵¹He nau te aanan yawalina gaganina toto i loem labulabumwa. Ebo gamagal etega aanan ya ni an, inoke yawalina ni mihot sauga gegewena. Aanan ya iya tuwau, toto na talamwan ge gamagalau gegewel panayawiya yawaliliya hot nihi ahe.”

⁵²Yudiya baaba o hi hago, inoke heliya ya gamwaliyaa hi awabalgig nabi hi ba, “Tau ya, ga ni ola ge tuwana ni pem ta an?”

⁵³Yeisu i baek elal i ba, “Ya ba tunahot eliyamiu, ebo Gamagal Natuna tuwana nige nuku aan ge saliyana nige nuku iim, nige yawalimiu ni gagan. ⁵⁴Toto ebo tuwau ni an ge saliyau ni im, iya yawalina mihomihotina i gan, inoke lan mowamowasena elana na palutem yaomala. ⁵⁵Kaiwena tuwau iya aanan hot ge saliyau iya wewel hot. ⁵⁶Henala ebo tuwau ni an ge saliyau ni im, iya i minaa elau ge nau ya minaa elana. ⁵⁷Nam yawalina gaganina i patunau ge iya kaiwena yawaliu

^l 6:35 Diyo 4:14 ^m 6:39 Diyo 10:28-29; 17:12 ⁿ 6:42 Mat 13:55 ^o 6:44 Diyo 6:65
^p 6:45 Ais 54:13 ^q 6:46 Diyo 1:18 ^r 6:47 Diyo 3:15-16 ^s 6:48 Diyo 6:32,58

i gan. Inoke i ola al to, henala ebo tuwau ni an, he nau kaiweu yawalina ni gan.^t ⁵⁸He toto o iya te aanan toto i loem labulabumwa. Tubumiyau aanan toto manna hi an, yaa abwe hi aliga. Yaa henala ebo aanan ya ni an, yawalina ni mihot sauga gegewena.” ⁵⁹Yeisu baaba ya i baunana awan Kapenyama elana, sauga i panpankiti limi tapwalolo gamwanaa.

Tohago Hi Gewi Hi Sikal

⁶⁰Sauga tohago Yeisu wana baaba o hi hago, yaka hi gewi hi ba, “Panpankiti ya i gasisi hot. Henala nasi ni atena?”

⁶¹Yeisu i atena te wana tohago hi hawohawol wana baaba o kaiwena, yaka i baik elal i ba, “Bi ola ge no baaba ya i panuwauwatu-agimiu ge amnamiu i apanak? ⁶²Yaa ga i ola ebo binimala nuku kite Gamagal Natuna ni na ni ha wana abamina elana toto valila i miminaa? ⁶³Yehoba Yayaluwana iya te bosowaina yawal ni pek gamagalau elal, gamagalau totoliya nige bosowailiya. He baaba bolo ya baunanagil eliyamiu iya Yehoba Yayaluwana ge yawal ni pewa. ⁶⁴Yaa komiu enuna nige ku aabulilek.” (He Yeisu iyaka i atena te bolo nige nihi aabulilek-an ge toto abwe ni wasaan Yudiya elal.)^u ⁶⁵Yeisu i ba vevehe al i ba, “Bolo nige ku aabulilek kaiwemiu te ya ba, ‘Nige etega bosowaina ni nem elau ebo Nam nige aatena ni pepekan elana ge ni nem.’”^v

⁶⁶Sauga o elana, Yeisu wana tohago hi gewi hi sikal ge nige al hi totoulil. ⁶⁷Yaka i nel bolo ali toto elulutega eluwa elal i ba, “Yaa komiu, nuwamiu al nuku egon?”

⁶⁸Saimon Pita Yeisu anana i lahe i ba, “Babala, henala abwe elana naha noek? Owa heiya te wam baaba yawal mihomihotina ni pem.” ⁶⁹He iyaka ha atena ge ha abulilek age owa Yehoba wana Gamagal Bwabwalena.”

⁷⁰Yeisu i baik elal i ba, “He nau ami toto elulutega eluwa ya hilemiu, age? Yaa alomiu etega iya Seitani awana toabina.” ⁷¹Yeisu i baaba Yudasas toto Saimon Isikaliyota natuna bana. He bwagana iya bolo elulutega eluwa avaliya etega, yaa abwe Yeisu ni wasaan.

Yeisu Alonau ge Talinau

7 ¹Sauga o enaa, yaka abwe Yeisu i nawanawa labi Galili gamwanaa. Nige nuwana ni na ni nawanawa labi Yudiya gamwanaa, kaiwena Yudiya wali tohouwa nuwaliya nihi lopaaliga.^x ²He Yudiya wali hagali bwabwatana etegana alana Epanapana Hagalena^y ana sauga i kelaubwa,^z ³inoke Yeisu talinau hi baik elana hi ba, “Labi ya nu eguluwan nu na

^t 6:57 1Diy 3:24 ^u 6:64 Diyo 13:11 ^v 6:65 Diyo 6:44 ^w 6:68-69 Mat 16:16

^x 7:1 Diyo 5:18 ^y 7:2 Epanapana Hagalena nu kite Baaba Ona ali Sapu ana Abaloya elana.

^z 7:2 Lib 23:34

Yudiya, inoke wam tohago wam ginol yawiyawi ona nihi kite. ⁴Ebo gamagal etega nuwana wasana ni bwata ge boda nihi atena, he wana ginol ona nige ni giginol susumian. Ginol yawiyawi ona u awaawaginol, he nu ginola mwananala inoke gamagalau gegewel panayawiya nihi kite.” ⁵Bwagana iya talinau, he nige hi aabulilek eliyana.“

⁶Yaka Yesu i baek talinau elal i ba, “No sauga hot nige ya ga i pwapwawa, yaa komiu wami sauga ya te sauga gegewena. ⁷Nige bosowaina gamagalau panayawi nihi pihigelgel-agimiu, yaa nau hi pihigelgel-agau, kaiwena ya baek elal ya ba, ‘Wami pagan i nak.’ ⁸Komiu ku nok ku na Yelusalema hagaliya. Nau nige ya ga na nonok, kaiwena no sauga nige ya ga i vivin.” ⁹Yesu baaba o i baunan talinau elal, yaka nige i nonok, i minaa ya Galili.

Yesu I Panpankiti Yelusalema Hagali ana Sauga elana

¹⁰Yesu talinau hi egon hi na hagaliya, eliyaa yaka abwe iya i nok al, yaa nige i nonomasamasal, i nonosusumi ya. ¹¹Hagali gamwanaa Yudiya wali tohouwa Yesu hi loyaan ge hi nel hi ba, “Iya ga?”

¹²Boda gamwanaa gamagalau hi loliwaliwan nabi Yesu kaiwena. Enuna hi ba, “Iya tau waiwaisana,” yaka enuna al hi ba, “Nige ya, iya gamagalau i nul pagegel.” ¹³Yaa nige etega i babaa tagil boda bwabwatana gamwanaa, kaiwena Yudiya hi lovakun wali tohouwa elal.

¹⁴Hagali iyaka i lilinuwane, yaka Yesu i na i tuk Limi Bwabwalena ana bakubakuwa ge i panpankiti. ¹⁵Yudiya nuwaliya hi ahe wana panpankiti kaiwena, ge hi ba, “Tau ya nige i vavasili, yaa ga i ola ge wana aatena i bwata?”^b

¹⁶Yesu analiya i lahe i ba, “No panpankiti ya, nige totou no nuwatu elana i oola, yaa i neem toto i patunau elana.” ¹⁷Ebo gamagal etega nuwana ni ginol ni ola Yehoba wana nuwatu, inoke abwe ni atena te no panpankiti i neem Yehoba elana, o ebo totou no nuwatu elana. ¹⁸Gamagal toto ebo i baaba totona wana nuwatu elana, he nuwana totona ana tobal ni ginol ge wasana ni gan. Yaa toto i tuwalali toto i patuna ana tobal kaiwena, iya tobaaba tunahot ge nige kakawi i gagana elana. ^d ¹⁹Mosese Logugui i pewa eliyamiu, age? Yaa komiu nige etega Logugui o i hehenapu-an. He ga i ola ge nuwamiu nuku lopaaligau?”^e

²⁰Gamagalau Yesu anana hi lahe hi ba, “Tabam yayaluwa bibikena i ulutuk elam te u baaba ei! Henala ge nuwana ni lopaaligawa?”^f

²¹Yesu analiya i lahe i ba, “Ginol yawiyawi etega ya ginol, yaka gegewemiu nuwamiu ku ahe ge ku nuwanuwatu-an. ²²Yaa ku nuwatu ga! Mosese gotomwa yoho paganina ana logugui i pewa eliyamiu, inoke komiu

^a 7:5 Tuw 1:14 ^b 7:15 Mat 13:54; Luke 2:47 ^c 7:16 Diyon 12:49; 14:10 ^d 7:18 Diyon 8:50
^e 7:19 Tuw 7:53; Loma 2:21-24 ^f 7:20 Diyon 8:48; 10:20

gotomwa yoho paganina ku giginola Sabwata elana. (He nige tage Mosese i telipuna-an, yaa i neem tubumiyau houhouwel hot elal.)^g ²³He bosowaina wawaya melutauina gotomwa yoho paganina ni ahe Sabwataa ebo ana lan i pwawaa, ge Mosese wana logugui o bahi nuku leleke.^h Inoke hauna kaiwena gamagal ya pwamolu hoti Sabwataa ge ku hugaagau?ⁱ ²⁴Bahi al nuku hilihilik bugul ali awa elana, yaa sapu elana te nuku hilihiliya.”

Yudiya Hi Ba, “Yeisu Iya Mesaiya o ebo Nigeya?”

²⁵Yaka gamagalau Yelusalema enuna hi ba, “Tau toto tage tohouwa hi lolopaaaliga heiya e? ²⁶Ku kite! I baaba boda gamwanaa ge tohouwa nige hi babaa lahiek eliyana. Bi ola ge hi atena tau ya iya Mesaiya? ²⁷Yaa sauga ebo Mesaiya ni nem, nige gamagal etega wana abanem ni aatena. He kila tau toto ya wana abanem ta atena ya.”^j

²⁸Yeisu iyoho ya i panpankiti boda elal Limi Bwabwalena gamwanaa, i baaba anana i bwaya i ba, “He tage ku atena ge no abanem al ku atena? Nau nige totou ya nenem. Nam i patunau te ya nem ge iya wana pagan i sapu. Iya nige ku aatena,^k ²⁹yaa nau ya atena, kaiwena iya i patunau ge ya neem elana.”

³⁰Yeisu i ba ola o, inoke Yudiya nuwaliya nihi lib ge nihi yowan. Yaa nige bosowaina gamagal etega nimana ni teli tuwanaa, kaiwena wana sauga nigeya ga i vivin.^l ³¹Yaa boda gamwanaa gamagalau hi gewi hi abulilek Yeisu elana, yaka hi ba, “Sauga ebo Mesaiya ni nem, nasi tab tau ya wana ginol yawiyawi ni lake? He nigeya, iya te Mesaiya.”

³²Palisi hi hago boda hi lololiwaliwan kekei Yeisu kaiwena i ola to. Yaka avaliyau ge topowon bwabwatal, Limi Bwabwalena ana pulisimanau hi patunal hi nok tage Yeisu nihi lib ge nihi yowan.

³³Yaka Yeisu i ba, “No minamina alowau komiu sauga kakaubwaina ya, inoke abwe na eguluwagimiu ge na sikal na na toto i patunau elana. ³⁴Abwe nuku loyaagau, yaa nige nuku pwapwawau, kaiwena nige bosowaina nuku noek labi toto ya nana ya miminaa.”^m

³⁵Yudiya wali tohouwa ya awawal hi pebaaba-agil hi ba, “Tau ya ga i nonoek ge nasi ta loyaan nige ta pwapwawa? Age i nana Gilik awanina ona bolo Yudiya hi miminaa, inoke ni panpankiti Gilik elal? ³⁶Iya i ba, ‘Abwe nuku loyaagau, yaa nige nuku pwapwawau.’ Ge i ba, ‘Nige bosowaina nuku noek labi toto ya nana ya miminaa.’ He wana baaba o ana sapu ga i ola?”

Wewel Yawalina Gaganina Bana

³⁷Hagali ana lan mowamowasena, iya lan bwabwatana hot, Yeisu i lut ge i baaba anana i bwata i ba, “Toto ebo ni walem, ni nem elau ge

^g 7:22 Lib 12:3; Aba 17:9-13 ^h 7:23 Mosese wana logugui etegana i ba wawaya wana lan eit elana te gotomwa yoho paganina ni ahe. ⁱ 7:23 Diyo 5:8-10,16 ^j 7:27 Diyo 7:41; 9:29
^k 7:28 Mat 11:27; Diyo 8:55 ^l 7:30 Diyo 7:44 ^m 7:34 Diyo 8:21; 13:36

ni im.ⁿ ³⁸He toto ebo ni abulilek-agau, inoke wewel yawalina gaganina ni sani tagilem atena, i ola Buki Bwabwalena ana baaba.”^o ³⁹Yeisu i baaba Yayaluwa Bwabwalena bana, iya gamagalau bolo hi abulilek Yeisu elana abwe nihi ahe. Sauga o elana Yayaluwa Bwabwalena nige ya ga hi aahe, kaiwena nige ya ga Yehoba Yeisu i papalutem yaomala ge i papawasawasa.^p

⁴⁰Boda bwabwatana gamwanaa, gamagalau enuna Yeisu wana baaba o hi hago, yaka hi ba, “Tunahot tau ya iya palopita toto Yehoba i bateli abwe ni nem.”^q

⁴¹Enuna al hi ba, “Iya Mesaiya.”

Yaa enuna hi ba, “Mesaiya nige ni neneem Galili!”^r ⁴²Buki Bwabwalena i ba Mesaiya abwe ni neem Deibid tubutubunina elana, ge nihi aba Bedeliyema awan toto valila Deibid i miminaa.”^s ⁴³Inoke Yeisu kaiwena gamagalau boda hi paeluwa, tomaha wali nuwatu. ⁴⁴Enuna nuwaliya nihi lib ge nihi yowan, yaa nige gamagal etega nimana i teteli Yeisu tuwanaa.

Yudiya wali Tohouwa Nige Yeisu Hi Aabulilekan

⁴⁵Inoke pulisimanau bolo Limi Bwabwalena ana tomatahikan hi sikal hi na topowon bwabwatal avaliyau Palisi elal, yaka abwe heliya hi ba, “Hauna kaiwena nige ku aahe ge ku pwapwatanim?”

⁴⁶Yaka analiya hi lahe hi ba, “Nige sauga etega gamagal etega wana baaba i oola tau ya wana baaba!”^t

⁴⁷Yaka Palisi hi baek pulisimanau elal hi ba, “Bi ola ge komiu al nuwamiu i liwan ahe? ⁴⁸Ama Palisi alomeyau ge tologugui, tab etega ha abulilek elana?”^u ⁴⁹Nige ya hot! He boda ya te hi abulilek elana, heliya Mosese wana Logugui nige hi aatena, heliya Yehoba iyaka i ba haba abwe ni lahel!”

⁵⁰Nikodimas, iya Palisi wali boda etega ge iya valila i nok ga i na Yeisu elana, i baek alonau elal i ba,^v ⁵¹“Wala logugui i ba bahi gamagal etega ana logugui ta giginol ebo nige ya ga wana baaba ta hahago kot elana ge ta pwapwawa hauna gun i ginol panak.”

⁵²Anana hi lahe hi ba, “He ga i ola, age owa al u neem Galili? U na ga Buki Bwabwalena u ahe u vasili bubun, inoke abwe nu atena te nige palopita etega ni neneem Galili.”^w

Yova Etega Hi Pwawaa Ganawal Paganina elana

8 ¹Yaka gamagalau gegewel hi egonan hi na tomaha ona wali limiya, yaa Yeisu i egon i na i ha Oya Olibe. ²Lan i gan al mweluluga

ⁿ 7:37 Lib 23:36; Ais 55:1; Diyo 4:14 ^o 7:38 Ais 58:11 ^p 7:39 Diyo 16:7; 20:22; Tuw 2:4

^q 7:40 Diyo 6:14 ^r 7:41 Diyo 1:46 ^s 7:42 Same 89:3-4; Maik 5:2 ^t 7:46 Mak 1:22

^u 7:48 Diyo 12:42 ^v 7:50 Diyo 3:1-2 ^w 7:52 Diyo 7:41-42

kekeisi, Yeisu i sikal i na Limi Bwabwalena ana bakubakuwa, yaka boda hi nowanik hi na hi mipainan, ge iya i misiyo i panpankiti elal. ³Logugui ana topankite avaliyau ge Palisi yova etega hi ahe hi en tukan, yova o hi pwawaa ganawal paganina elana. Inoke hi patalmilil boda mataliyaa, ⁴yaka hi baik Yeisu elana hi ba, “Topankite, yova ya hi pwawa hoti alona tau etega hi gaganawal. ⁵He Logugui elana Mosese i ba yova gaganawalina lolana ya naha loipati ana siga ni aliga. Yaa owa wam nuwatu ga i ola?”^x ⁶Nel ya hi neli tage Yeisu nihi paona ge ana woliwoli nihi ginol.

Yaa Yeisu i lokululu ge nimana gigina elana i leleli bilibiliya. ⁷Heliya iyoho ya hi mimi nelnel elana, yaka i mat ge i ba, “Ebo komiu etega nige gegi etega i giginol, inoke iya pat ni alihouwan yova ya elana.”^y ⁸Yaka i lokululu al ge i leleli bilibiliya.

⁹Wana baaba o hi hago, yaka maisena ge maisena i egoegon, i telipunaa tonowakau elal i na ana siga gegewel hi egonan haba. Yeisu maisena ya hi eguluwai alona ge yova iyoho ya i taltalmilil. ¹⁰Yeisu i mat ge i baik yova elana i ba, “Vaini, gamagalau gegewel heliya ga? Nige etega i mimina ge ni pakotiwa?”

¹¹Yova Yeisu anana i lahe i ba, “Tonowak, nige etega.”

Yaka Yeisu i ba, “Nau al ge nige na papakotiwa. He u egon ge bahi al nu gegegi.”^{z a}

Yeisu Iya Panayawi ana Mwananal

¹²Yeisu i baik al gamagalau elal i ba, “Nau panayawi ana mwananal. Toto ebo ni toulilau nige al ni nanawaa gougouwa, iya yawal ana mwananal ni ahe.”^b

¹³Yaka Palisi hi baik elana hi ba, “Totom wasam te u wasawasa-an ei, he nige bosowaina ana abulilek-an ni gan.”

¹⁴Yeisu Palisi analiya i lahe i ba, “Bwagana ebo totou wasau na wasawasa-an, he bosowaina ya te ana abulilek-an ni gan, kaiwena ya atena te ga ya noem ge ga ya nonoek. Yaa komiu nige ku aatena te ga ya noem o ebo ga ya nonoek.”^c ¹⁵Komiu wami kite ge wami hilihili i ola gamagalau wali hilihili. Yaa nau nige gamagal etega ya hihile ge ana lahi ya babaunan.^d ¹⁶Yaa binimala ebo gamagal etega na hile ge ana logugui na baunan, he no logugui i sapu ge i tunahot, kaiwena nige totou logugui o ya giginol, yaa Nam toto i patunau iya alou.^e ¹⁷Komiu wami logugui elana hi leli lowan te ebo gamagalau eluwa wali wasa ni olaolaek,

^x 8:5 Lib 20:10; Log 22:22-24 ^y 8:7 Log 17:7 ^z 8:11 Toledi papanet houhouwel enuna sekson ya 8:1-11 hi leli, enuna nigeaya. ^a 8:11 Diyo 5:14 ^b 8:12 Ais 49:6; Diyo 1:4-9; 9:5; 12:46 ^c 8:14 Diyo 5:31-32; 7:28 ^d 8:15 Diyo 12:47 ^e 8:16 Diyo 5:30; 8:29

he i tunahot.^f ¹⁸Nau totou wasau ya wasawasa-an, i ola al Nam toto i patunau, iya al wasau i wasawasa-an.”^g

¹⁹Yaka Yudiya Yeisu hi neli hi ba, “He tamwam ga?”

Analiya i lahe i ba, “Nau nige ku aatenau, ge Nam al nige ku aatena. Ebo binimala nuku atena, inoke Nam al nuku atena.” ²⁰Yeisu baaba bolo ya i baunanagil, sauga iya iyoho i panpankiti Limi Bwabwalena gamwanaa, labi toto mulolu ana abateliteliya. Yaa nige gamagal etega Yeisu i lilib ge ni yowan, kaiwena wana sauga nige ya ga i vivin.^h

Gamagalau Hi Nuwa Gewagewa Yeisu kaiwena

²¹Yeisu i baik al Yudiya elal i ba, “Ya eegon, ge abwe nuku loyaagau, yaa nige nuku kikiteyau. He wami gegi elana nuku yaomal. Komiu nige bosowaimiu nuku nem labi toto ya nonoek.”ⁱ

²²Yaka Yudiya wali tohouwa hi ba, “Iya i ba, ‘Komiu nige bosowaimiu nuku nem labi toto ya nonoek.’ Baaba o ana sapu ga i ola? Age totona yawalina ni pwamowasi?”

²³Inoke Yeisu i ba vevehe al i ba, “Komiu ku neem paiya, nau ya neem natiya. Komiu panayawi toto ya gamagaliliyau, nau nige panayawi toto ya gamagalina i oola.^j ²⁴Heiya ge kaiwena ya ba, ‘Wami gegi elana nuku yaomal.’ He ebo nige nuku aabulilek te ‘Nau heiya te nau,’^k inoke wami gegi elana nuku yaomal.”

²⁵Yaka Yudiya hi neli hi ba, “Yaa henala owa?”

Analiya Yeisu i lahe i ba, “He nau heiya te toto valila ya wasaan eliyamiu. ²⁶Bugul i gewi bosowaiu na baunan kaiwemi ge ami lahi na ginol. Yaa nige ya babaunan, kaiwena toto i patunau iya tobaaba tunahot ge bugul bolo ya hagowa elana ya te na baunan komiu panayawi gamagaliliyau eliyamiu.”

²⁷He Yudiya nige hi aatena te Yeisu age i baaba Tamana kaiwena.

²⁸Inoke Yeisu i ba, “Sauga Gamagal Natuna nuku teli heyana kolos elana, inoke abwe nuku atena te ‘Nau heiya te nau,’ ge nuku atena nige bugul etega totou ya giginol, yaa toto Nam i pankiteyau te ya baubaunan.^l ²⁹He toto i patunau iya alou. Iya nige i mimiluwagau, kaiwena sauga gegewena bugul bolo i yaliyaya-an te ya giginolil.” ³⁰Gamagalau bolo Yeisu wana papaatena o hi hago, hi gewi hi abulilek-an.

Abalahama Natunau ge Seitani Natunau Baliya

³¹Yaka Yeisu i baik bolo wana panpankiti hi abulilek-an elal i ba, “Ebo nuku minaa no panpankiti elana, he komiu no tohago hot. ³²Inoke baaba tunahot nuku atena ge baaba tunahot o ni sokalimiu.”

^f 8:17 Log 19:15 ^g 8:18 1Diy 5:9 ^h 8:20 Diyo 7:30 ⁱ 8:21 Diyo 7:34; 13:33

^j 8:23 Diyo 3:31 ^k 8:24 Baaba toto “Nau heiya te nau, nau iyoho ya gangan,” Yehoba i baunan Moses elana Totagil 3:14 elana. Yeisu baaba ya i baunan al iya kaiwena. Diyon 8:28; 8:58 ge 13:19 nu kite al. ^l 8:28 Diyo 3:14

³³Yaka Yeisu anana hi lahe hi ba, “Ama Abalahama tubutubunau, nige sauga etega ha tutuwalali loloyowan gamagal etega elana. Ga i ola ge u ba, ‘Baaba tunahot ni sokalimiu?’”^m

³⁴Yeisu i baek elal i ba, “Ya ba tunahot eliyamiu, gamagalau gegewel bolo gegi hi awaawaginol, heliya gegi wana totuwalali loloyowanil.”ⁿ

³⁵Totuwalali loloyowanina nige i mimihot wana babala alonau ge natunau ali boda elana, yaa babala natuna i mihot boda o elana. ³⁶He ebo Yehoba Natuna ni sokalimiu, yaka abwe nuku tabwa gamagalau sokasokalil hot. ³⁷Ya atena te komiu Abalahama tubutubunau. Yaa nuwamiu hot nuku lopaaligau, kaiwena no panpankiti ku towani. ³⁸Bugul bolo ya kiteya Nam elana ya wasawasa-an, yaa komiu pagan bolo ku aheya tamamiu elana te ku giginol.”

³⁹Inoke anana hi lahe hi ba, “Ama tamama te Abalahama.”

Yaka abwe Yeisu i ba, “Ebo binimala Abalahama natunau komiu, he wami ginol ni ola iya wana ginol.”^o ⁴⁰Baaba tunahot bolo ya hagoem Yehoba elana heiya te ya baunan eliyamiu, yaa komiu nuwamiu hot nuku lopaaligau. Abalahama ginol ololana o nige i giginol. ⁴¹He komiu wami ginol i ola ya te tamamiu wana ginol.”

Yaka anana hi lahe hi ba, “Ama nige ganawal natunau i oola. Ama tamama iya te Yehoba maisena.”^p

⁴²Inoke Yeisu i baek al elal i ba, “Ebo binimala Yehoba iya tamamiu, he nasi nuku nunuwana-agau, kaiwena nau ya miminaa elana te ya nem e. He nau nige totou ya nenem, iya i patunau. ⁴³Ga i ola ge no baaba nige nuwamiu i sasapan? Kaiwena nige nuwamiu i oola no baaba nuku hago. ⁴⁴Komiu tamamiu Seitani, iya natunau komiu, ge sauga gegewena nuwamiu tamamiu wana nuwatu nuku toulil. I neem abatelipuna elana iya totaulol, ge nige sauga etega i oolal baaba tunahot elana, kaiwena nige baaba tunahot i gagana elana. Sauga ebo i kakawi, he iya wana pagan hot to, kaiwena iya tokakawi ge kakawi paganina gegewel tamaliya.”^q ⁴⁵Yaa kaiwena nau baaba tunahot ya baubaunan, komiu nige ku aabulilek-agau. ⁴⁶Age ku nuwatu tage nau togegi? Ebo ku nuwatu ola o, he no gegi etega nuku pamasal ge nuku patunahot. Yaa ebo ya baaba tunahot, he ga i ola ge nige ku aabulilek-agau?”^r ⁴⁷Yehoba natunau Yehoba wana baaba hi hago. Komiu nige Yehoba wana baaba ku hahago, kaiwena komiu nige Yehoba natunau i oola.”^s

Yeisu Alona ge Abalahama Baliya

⁴⁸Yudiya Yeisu anana hi lahe hi ba, “Tabam ha ba bubun ya te ha ba owa Sameliya gamagalina ge yayaluwa bibikena i ulutuk elam!”^t

^m 8:33 Mat 3:9 ⁿ 8:34 Loma 6:16,20 ^o 8:39 Mat 3:9 ^p 8:41 Ais 63:16

^q 8:44 1Diy 3:8 ^r 8:46 2Kol 5:21; 1Pit 2:22 ^s 8:47 1Diy 4:6 ^t 8:48 Mak 3:21-22

⁴⁹Yaka analiya i lahe i ba, “Nige yayaluwa bibikena i uulutuk elau. Nau Nam ya awatauwana, yaa komiu nige ku aawatauwagau. ⁵⁰Nau nige ya lologasisi tage alau na teli heyana, yaa etegana iyoho nuwana alau ni teli heyana, ge iya Tohilihili sasapona hot. ⁵¹Ya ba tunahot eliyamiu, toto ebo no baaba ni henapuan nige bosowaina ni yaomal.”^u

⁵²Inoke Yudiya hi baek elana hi ba, “Yaka abwe ha atena tunahot age yayaluwa bibikena i ulutuk elam! Abalahama ge palopitau iyaka hi yaomal, inoke owa u ba, ‘Toto ebo no baaba ni henapuan nige bosowaina ni yaomal.’ ⁵³Tubuma Abalahama iyaka i yaomal! Age owa u bwata lake? Ge palopitau al iyaka hi yaomal! He u nuwatu tage henala owa?”

⁵⁴Yeisu analiya i lahe i ba, “Ebo binimala totou alau na teli heyana, he nasi alau ni tabwa bugul bwagabwaga ya. Yaa Nam toto komiu ku ba, ‘Iya wama Yabowaine,’ iya alau i teliteli heyana. ⁵⁵He iya nige ku aatena, yaa nau ya atena. Binimala ebo na ba, ‘Iya nige ya aatena,’ he nau na tabwa tokakawi ni ola komiu. Yaa iya ya atena ge wana baaba ya henapuan. ⁵⁶Valila tubumi Abalahama i nuwatu tage no sauga masal panayawi ni kite, inoke i yaliyaya; ge sauga i kite, yaka nuwana i waisi.”

⁵⁷Yaka Yudiya hi baek elana hi ba, “Wam baliman nige ya ga pipti i pwapwawa, inoke ga i ola ge u ba tage Abalahama u kite?”

⁵⁸Analiya i lahe i ba, “Ya ba tunahot eliyamiu, mulaa abwe Abalahama i masal, nau iyoho ya gangan.”^{v w}

⁵⁹Yeisu wana baaba o kaiwena, yaka pat hi ahe tage nihi loipati, yaa i bunsumi, ge abwe Limi Bwabwalena ana bakubaku i eguluwai.

Yeisu Tomatakai Matana I Panana

9 ¹Sauga Yeisu i nawanawa kamwasaa, inoke tomatakai etega i kite, matana i kaiek hinana tinenaa. ²Wana tohago hi neli hi ba, “Topankite, henala wana gegi kaiwena ge tau o hi ab matana i kai? Iya totona wana gegi o ebo hinana ge tamana wali gegi kaiwena?”^x

³Yeisu i ba, “Nige iya wana gegi o ebo hinana ge tamana wali gegi kaiwena i oola ge matana i kakai. Matana i kai inoke bosowaina Yehoba wana gasisi ni tuwalaliya elana ge gamagalau nihi kite.”^y ⁴Sauga ya lan iyoho ya i gangan, inoke toto i patunau wana tuwalali ta ginol ga. Bulin i nenem ge nige bosowaina gamagal etega ni tuwalali. ⁵Sauga nau iyahe panayawiya, he nau panayawi ana mwananal.”^z

⁶Yeisu baaba o i baunan enaa, yaka i kuluvi bilibiliya, kuluvena elana pweyapweya i ginol, ge i ahe i abut tomatakai matanaa.^a ⁷Inoke i baek elana i ba, “U nok u na wewel opop Sailowama elana matam u ul.” (Alan

^u 8:51 Diyo 5:24 ^v 8:58 Diyon 8:24 ana epwamwananal paiya nu kite. ^w 8:58 Diyo 1:1
^x 9:2 Isik 18:20; Luke 13:2,4 ^y 9:3 Diyo 11:4 ^z 9:5 Mat 5:14; Diyo 8:12 ^a 9:6 Mak 8:23

Sailowama ana sapu te Papatuna.) Yaka tau o i nok i na matana i ul, ge i sikal matana i waisi ge bugul i kitel.

⁸Tau o wana heliyamwau ge gamagalau bolo valila hi kite i loloawanun hi ba, “Tau toto valila i mimisiyo ge i loloawanun heiya eba e?”

⁹Inoke enuna hi ba, “Ibwe, tauina te.”

Yaa enuna hi ba, “Nige i oola. Ana awa ya te i ola iya.”

Yaa tau o totona i ba, “He nau te.”

¹⁰Yaka hi neli hi ba, “He ga i ola ge matam u panana?”

¹¹Analiya i lahe i ba, “Tau toto alana hi ba Yesu, pweyapweya i ginol, i ahe i abut matawa, yaka i ba, ‘U nok u na Sailowama matam nu ul.’ Inoke ya na matau ya ul, yaka matau i waisi ge bugul ya kitel.”

¹²Inoke hi neli hi ba, “Tauina iya ga?”

Analiya i lahe i ba, “Nige ya aatena.”

Palisi Hi Nel Patipati Tau toto Valila Matana I Kai elana

¹³Inoke gamagalau tau toto valila matana i kai hi ahe ge hi pwatanik Palisi elal. ¹⁴He lan Sabwata elana te Yesu pweyapweya i ginol ge i abut tomatakai matanaa inoke matana i panana. ¹⁵Inoke Palisi al hi nel hi ba, “Ga i ola ge matam i waisi?”

Analiya i lahe i ba, “Yesu pweyapweya i abut matawa, ya na matau ya ul, inoke sauga o matau i waisi ge bugul ya kitel.”

¹⁶Yaka Palisi enuna hi ba, “Tau ya nige i neneem Yehoba elana, kaiwena Sabwata ana logugui nige i hehenapu-an.”

Enuna al hi ba, “Ginol yawiyawi lololana o togegi bosowaina ya ni ginol?” Yaka ali boda hi paeluwa ge hi awabalgig.

¹⁷Inoke abwe Palisi hi nel al tau toto valila matana i kai elana hi ba, “Yaa owa wam nuwatu ga i ola tau o kaiwena? Kaiwena owa te matam i abubun.”

Tau o analiya i lahe i ba, “Iya palopita etega.”^b

¹⁸Yaa Yudiya wali tohouwa nige hi aabulilek te tau o valila matana i kai ge iyaka i waisi. Inoke tamana ge hinana ali baaba hi patuna hi nem elal, ¹⁹yaka hi nelil hi ba, “He natumiu e, toto ku ba tage valila ku ab ge matana i kai? Ga i ola ge sauga ya matana i waisi?”

²⁰Tamana ge hinana hi ba, “Ha atena te iya natuma, ge ha atena te sauga ha ab matana i kai. ²¹Yaa nige ha aatena te ga i ola ge matana i waisi, o ebo henala matana i sawal ge i mwapwela. He ku neli; iya iyaka i bwaya, inoke bosowaina totona wasana ni wasaan.” ²²Tamana ge hinana hi ba ola o kaiwena Yudiya wali tohouwa hi lovakunagil. He heliya logugui iyaka hi ginol te henala ebo Yesu ni awa Mesaiya-an, nasi nihi lopwali bahi avaliya nihi tatapwalolo al wali boda elana. ²³Heiya te kaiwena tamana ge hinana hi ba, “Iya iyaka i bwaya; ku neli.”

^b 9:17 Diyo 4:19

²⁴Inoke Palisi tau toto valila matana i kai hi yogaan i tuk paeluwana, ge hi baek elana hi ba, “Nu papasila Yehoba matanaa ge nu baaba tunahot! Ama ha atena tau o iya togegi.”

²⁵Yaka i baek elal i ba, “Nige ya aatena ebo iya togegi o ebo nige ya. Yaa toto ya atena, heiya te valila matau i kai ge sauga ya iyaka i waisi!”

²⁶Inoke hi neli hi ba, “He hauna gun i ginol elam? Ga i ginol ola ge matam i mwapwela?”

²⁷Analiya i lahe i ba, “Iyaka ya ba haba eliyamiu, yaa komiu nige ku hahago. Hauna kaiwena nuwamiu na baunan al nuku hago? Tabam komiu al ge nuwamiu nuku tabwa wana tohago.”

²⁸Yaka hi ba panapanak-an ge hi baek elana hi ba, “Owa tau o wana tohago, yaa ama Mosese wana tohago. ²⁹Ama ha atena te Yehoba i baaba Mosese elana ge logugui i pek. Tau ei nige ha aatena te ga i noem!”

³⁰Inoke analiya i lahe i ba, “Nuwau i gewagewa-agimiu! Kaiwena ku ba, ‘Nige ha aatena ga i noem,’ yaa iya te matau i abubun ge i waisi. ³¹Ta atena te Yehoba nige i lalaegan togegi elal. He i laegan te bolo hi awatawan ge wana nuwatu hi ginol. ^c ³²Abatelipuna elana i nem ana siga sauga e, nige sauga etega wasa ta hahago tage gamagal etega toto hi ab matana i kai, matana nihi abubun ge ni waisi. ³³Binimala tau ya nige ni nonoem Yehoba elana, he nige bosowaina bugul lololana ya etega ni ginol.”

³⁴Yaka hi baek elana hi ba, “Owa gegi elana u masala ge u bwayaa! Ga i ola ge tage nu panpankiti eliyama?” Inoke hi take tagilan ge i egon.^d

Bolo Nige Hi Aabulilek Heliya Hi Ola Tomatakai

³⁵Yeisu tau wasana i hago te hi take tagilan, inoke i loyaan, ge sauga i pwawa, yaka i baek elana i ba, “Tab u abulilek Gamagal Natuna elana?”

³⁶Tau o i ba, “Tonowak, henala Gamagal Natuna? No wasa u pem inoke na abulilek elana.”

³⁷Yeisu i ba, “Iyaka u kite haba; iya te sauga ya alom ku liwaliwan e.”

³⁸Inoke tau o i ba, “Babala, iyaka ya abulilek.” Inoke i loepwakoku ge i kululu Yeisu elana.

³⁹Yeisu i ba, “Ya nem panayawiya ge gamagalau wali pagan na teli tagilan mwananala, inoke tomatakai mataliya nihi panana, ge bolo tage mataliya waiwaisana mataliya ni kai.”

⁴⁰Palisi enuna bolo hi minaa Yeisu labenaa, wana baaba hi hago, yaka hi nel hi ba, “He ga i ola? Age u ba tage ama al matama i kai?”^e

⁴¹Yeisu i baek elal i ba, “Binimala ebo nuku ba, ‘Ama matama i kai,’ he Yehoba nige ni lalahemiu ni oola komiu togegi. Yaa komiu ku ba, ‘Ama matama i waisi,’ inoke wami gegi iyoho nige i momowasi.”

^c 9:31 Same 34:15 ^d 9:34 Same 51:5 ^e 9:40 Mat 15:14

Sipi ali Tomatahikan Waiwaisana

10 ¹Yeisu i ba, “Ya ba tunahot eliyamiu, henala ebo nige ni uulutuka sipi ali gana ana nog elana, yaa gana ni mwena likaan ge ni tuk, iya tokaoma ge toaluoyaoya. ²Yaa toto ebo ni ulutuka nog elana, iya sipi ali tomatahikan. ³Nog ana tomatahikan nog ni pwela eliyana, yaka ni tuk ge wana sipi alaliya ni lumenil, inoke wana sipi anana nihi hago ge ni nulil tagilagil tola. ⁴Sauga iyaka wana sipi i nulil ge hi tagil tola, inoke iya ni nohouwa ge sipi nihi noulil, kaiwena anana ana gun hi atena. ⁵Sipi nige gamagal getoga nihi nonoulil, yaa nihi lou luwan, kaiwena nige anana ana gun hi aatena.” ⁶Yeisu ba gohalibe ya i baunan Palisi eliyalil, yaa ana sapu nige hi aatena.

⁷Yaka i ba vevehe al i ba, “Ya ba tunahot eliyamiu, nau sipi ali gana ana nog. ⁸Bolo hi nem houwa gegewel tokaoma ge toaluoyaoya, inoke analiya sipi nige hi hahago.^f ⁹He nau nog; henala ebo ni uulutuka elau iya ni mwal. Iya ni tuk ge ni tagil, inoke mwawin waiwaisana ni pwawa. ¹⁰Tokaoma i nem nige bugul getoga kaiwena i oola, yaa kaoma kaiwena, tagapaaliga kaiwena, ge apapanak kaiwena. Yaa nau ya nem inoke no sipi yawaliliya nihi pwawa, yawal kalakalaopopwina.

¹¹“Nau sipi ali tomatahikan waiwaisana. Sipi ali tomatahikan waiwaisana yawalina i talamwan ni yaomal sipi kaiweliya.^g ¹²Tau toto i tuwalali mola kaiwena, iya nige sipi ali tomatahikan hot i oola, ge nige tonsipi i oola. Sauga ebo ni kite wanuka bekikina i nenem yaka sipi ali en ni pek ge ni lou luwagil, inoke wanuka sipi ni taltalagil ge ni takel pwapwaptagil.^h ¹³Tau o sipi i lou luwagil, kaiwena i tuwalali mola kaiwena, he nige i nuwanuwatu sipi kaiweliya.

¹⁴“Nau sipi ali tomatahikan waiwaisana. No sipi ya atenal ge heliya hi atenau, ¹⁵i ola te Nam i atenau ge nau Nam ya atena. Ge yawaliu ya talamwan na yaomal sipi kaiweliya.ⁱ ¹⁶No sipi enuna al hi gan, heliya nige gana ya sipiliyau i oola. Heliya al na ahel ge nihi nem. Anau nihi hago, inoke sipi ali yawi ni maisena ge ali tomatahikan ni maisena.^j ¹⁷Nam i nunuwana-agau, kaiwena yawaliu ya talamwan na yaomal— inoke abwe al na ahe pasikal.^k ¹⁸Nige gamagal etega bosowaina yawaliu ni pwamowasi, yaa totou te ya talamwan. No gasisi i gan yawaliu na talamwan na yaomal, ge no gasisi i gan na ahe pasikal. O logugui ya aheya Nam elana i ola to.”

¹⁹Yeisu wana baaba o kaiwena inoke Yudiya boda hi paeluwa al. ²⁰Hi gewi hi ba, “Yayaluwa bibikena i ulutuk elana ge i kokona tei. Ga i ola ge wana baaba ku lalaegan-an?”

^f 10:8 Yel 23:1-2; Isik 34:2-3 ^g 10:11 Same 23:1; Pan 7:17 ^h 10:12 Tuw 20:29

ⁱ 10:15 Mat 11:27; 1Diy 3:16 ^j 10:16 Ais 56:8; Isik 34:23 ^k 10:17 Pilp 2:8-9

²¹Yaa enuna hi ba, “Wana baaba nige i oola tau toto yayaluwa bibikena i ulutuk elana. He yayaluwa bibikena bosowaina ya tomatakai mataliya ni abubun ge ni waisi? Nige bosowaina!”

Yudiya Nige Yeisu Hi Aabulilekan

²²Saugena o tultul ana sauga, ge Yudiya wali tapwalolo hagalena etega i gan Yelusalema, hagali o wali Limi Bwabwalena ana pwabwabwalena nuwahikanina. ²³He Yeisu iyoho i nawanawa abanawanawa etega Limi Bwabwalena ana gana gamwanaa alana hi ba “Solomon wana Epanapana.” ²⁴Yaka Yudiya hi na Yeisu hi mipainan ge hi baik elana hi ba, “Hauna sauga ge abwe nuwama nu ba pasapu? He nu ba bubun naha hago ebo owa Mesaiya o ebo nigeya?”

²⁵Yeisu analiya i lahe i ba, “Iyaka ya ba haba eliyamiu, yaa komiu nige ku aabulilek-an. Ginol yawiyawi bolo Nam alana elana ya ginolil heliya hi pamasalau, ²⁶yaa nige ku aabulilek kaiwena komiu nige no sipi i oola. ²⁷No sipi anau hi hago ge ya atenal, inoke heliya hi toulilau. ²⁸Yawal mihomihotina ya pek elal ge nige nihi yayaomal. He nige gamagal etega bosowaina ni kaluoel nimwau elana.¹ ²⁹Heliya Nam i pem elau, ge iya bugul gegewel i bwata lakel. Inoke nige gamagal etega bosowaina ni kaluoel Nam nimanaa. ³⁰Nau alou ge Nam ha maisena ya.”

³¹Baaba o kaiwena, inoke Yudiya pat hi pebugul al tage Yeisu nihi loipati. ³²Yaa Yeisu i baik elal i ba, “Ginol waiwaisal hi gewi Nam i pem iyaka ya ginolil ge ku kitel. He hauna toto kaiwena ge nuwamiu nuku loipatagau?”

³³Yaka anana hi lahe hi ba, “Nige wam ginol waiwaisal etegana kaiwena i oola ge tage naha loipatagiwa, yaa kaiwena u ba bwagabwaga ge Yehoba u hewa likaan. He owa gamagal ya, inoke u ba tage owa Yabowaine!”^m

³⁴Yeisu analiya i lahe i ba, “Wami Buki Bwabwalena ana leleli etega Yehoba anana i pamasal i ola hiwe: Nau ya ba, ‘Komiu yabowaineyau.’ⁿ ³⁵Yehoba baaba ya i baunan gamagalau elal ge i ba tage heliya yabowaineyau, ge Buki Bwabwalena ana baaba i tunahot sauga gegewena. ³⁶Inoke sauga nau ya ba, ‘Nau Yabowaine Natuna,’ he ga i ola ge ku ba tage ya ba bwagabwaga ge Yehoba ya hewa likaan? He nau Nam i hileyau ge i patunau ya nem panayawi.

³⁷“Binimala ebo nige Nam wana tuwalali ya giginol, inoke bahi no baaba nuku aabulilek-an. ³⁸Yaa wana tuwalali ya awaawaginol, inoke ebo nige no baaba ku aabulilek-an, he no tuwalali o nuku abulilek-an. Inoke nuwamiu ni sapu ge nuku atena te Nam i minaa elau ge nau ya

¹ 10:28 Diyo 3:16; 6:39 ^m 10:33 Lib 24:16 ⁿ 10:34 Same 82:6

minaa Nam elana.”^o ³⁹Yaka nuwaliya al Yeisu nihi lib ge nihi yowan, yaa hi pihapul ge i noluwagil.

⁴⁰Inoke Yeisu i sikal wewel Yolidani i kalapanet-an, ge i na i miminaa labi toto valila Diyon gamagalau i pababitaisoliya.^p ⁴¹Gamagalau hi gewi hi nok elana, ge heliya ya hi baaba hi ola, “Diyon Tobabitaiso nige ginol yawiyawi etega i giginol, yaa baaba gegewena bolo i baunanagil tau ya kaiwena hi tunahot.” ⁴²Inoke labi o elana gamagalau hi gewi hi abulilek Yeisu elana.

Lasalo wana Yaomal Bana

11 ¹Tau etega alana Lasalo i kasiyebwa, iya alonau nunau Meli ge Mata wali panuwa Bedani.^q ²(Meli toto ya iya te enonu bwalena waiwaisana i holek Babala aenaa, ge kokowana pupunona elana i pwamwagamwaga. He iya nuna Lasalo te i kasiyebwa.)^r ³Inoke yowau labui ya baaba hi patuna Yeisu elana hi ba, “Babala, wam heliyam toto u nunuwana-an i kasiyebwa nabi.”

⁴Sauga Lasalo wana kasiyebwa wasana Yeisu i hago, inoke i ba, “Kasiyebwa toto ya nige ana nuwatu i oola tage gamagal ni payaomal, yaa Yehoba wana gasisi ni masal ge gamagalau alana nihi teli heyana. I ola al ginol o eliyana Yehoba Natuna alana nihi teli heyana.”^s ⁵Mata alona ge talina avaliya ge nuliya Lasalo Yeisu i nunuwana-agil. ⁶Yaa sauga Lasalo wana kasiyebwa wasana i hago, yaka lan eluwa i minaa ga awan toto i miminaa.

⁷Inoke abwe i baek wana tohago elal i ba, “Ta sikal ta na Yudiya.”

⁸Yaka anana hi lahe hi ba, “Topankite, abwe ya te Yudiya tage hi loloiapat-agiwa, yaka nuwam nu sikal al labi o elana?”

⁹Yeisu tohago analiya i lahe i ba, “Lan gamwanaa kilok matana auwa ali gewi tuwel mulaa abwe sabwelu ni lobek, age? He ebo gamagal ni nawanawa lan gamwanaa, aena nige ni tutupaan ge ni sosogu, kaiwena panayawi ana mwananal elana matana i mwananal. ¹⁰Yaa ebo i nanawaa bulin gamwanaa, he aena ni tupaan ge ni sogu, kaiwena nige wana mwananal.” ¹¹I ba ola o, yaka abwe i ba vevehe al i ba, “Wala heliyam Lasalo i kenu mati; na nok ge abwe na palut.”

¹²Tohago hi baek elana hi ba, “Babala, ebo i kenu mati, he abwe amnana ni waisi.” ¹³Yeisu i baaba Lasalo wana yaomal bana, yaa wana tohago hi nuwatu tage i kenu ya.

¹⁴Yaka abwe baaba enona hot i baunan elal i ba, “Lasalo iyaka i aliga. ¹⁵Yaa komiu ami labe kaiwena, inoke ya yaliyaya te nau nige ya miminek o, kaiwena toto ya abwe ni paabulilek-agimiu. He ta egon ta na ta kite.”

^o 10:38 Diyo 14:10-11 ^p 10:40 Diyo 1:28 ^q 11:1 Luke 10:38-39 ^r 11:2 Diyo 12:3

^s 11:4 Diyo 9:3

¹⁶Yaka Tomas, iya alana etega al Didimas, i baik wana pan tohago elal i ba, “Ehei, kila al ge ta nok, inoke avala ta yaomal toyawa.”^t

Yeisu Alonau Mata ge Meli Hi Liwaliwan Lasalo kaiwena

¹⁷Sauga Yeisu i vin Bedani, inoke wana wasa hi pek te Lasalo hi teli salaiya lan esopali iyaka i mowasi. ¹⁸Awan Bedani ge Yelusalema ali bwaga ana yapu tabam i ola ya te kilomita eton, ¹⁹inoke Yudiya hi gewi hi nok hi na Mata alona ge talina Meli elal nuwaliya nihi pwawaisi nuliya wana yaomal kaiwena. ²⁰Sauga Mata wasa i hago Yeisu iyoho i nenem, inoke i tagil limiya i nok ni na ni pwawa kamwasaa, yaa Meli i miminaa limiya.

²¹Mata i na i vin Yeisu elana, yaka i ba, “Babala, binimala owa iyahe aloma, he nu nige ni yayaomal. ²²Yaa bwagana o, ya atena hauna gun ebo nu awanuni Yehoba elana, sauga ya ni pewa.”

²³Yeisu i baik elana i ba, “Num abwe ni lut al.”

²⁴Mata i ba, “Ya atena te abwe ni lut al lan mowamowasena elana, sauga toto gamagalau gegewel nihi lut al.”^u

²⁵Yeisu i baik elana i ba, “Nau lut al ge yawal. Toto ebo ni abulilek-agau, bwagana ebo ni yaomal, yawalina ni gan; ²⁶ge toto yawalina gaganina, ebo ni abulilek-agau, nige ni yayaomal. Tab no baaba o u abulilek-an?”

²⁷Mata i ba, “Ibwe Babala, ya abulilek te owa Mesaiya, Yehoba Natuna, toto tage abwe i nenem panayawi.”^v

²⁸Sauga i baaba Yeisu elana enaa, yaka i sikal i na i walgumu talina Meli elana i ba, “Topankite iyahe i vin, ge i neliwa.” ²⁹Sauga Meli baaba o i hago, yaka etimwawa i lut i tagil ge i nok ni na Yeisu ni kite. ³⁰(He Yeisu nige ya ga i tutuk panuwaa, iyoho ya i minamina labi toto Mata i pwapwawaa.) ³¹Yudiya bolo avalu Meli hi miminaa limi gamwanaa ge nuwana hi pwawapwawaisi, hi kite Meli etimwawa i lut ge i na i tagil, inoke hi nuwatu tage i nana salaiya ge ni lonuwanak. Yaka hi lutan hi toulil.

³²Meli i na i vin labi toto Yeisu i miminaa, inoke sauga i kite, yaka i na i loepwakoku Yeisu aenaa ge i ba, “Babala, binimala owa iyahe aloma, he nu nige ni yayaomal.”

³³Yeisu i kite Meli i kahin, ge i ola al Yudiya bolo alonau hi nem hi lokahin, inoke atena i lomwan ge nuwana i nak nabi. ³⁴Inoke i nel i ba, “Tuwana ga ku teliya?”

Anana hi lahe hi ba, “Babala, u nem ga, ta na u kite.”

³⁵Yaka Yeisu i kahin.

³⁶Inoke Yudiya hi ba, “Ku kite, i nunuwana-an nabiyani!”

^t 11:16 Mak 14:31 ^u 11:24 Diyo 6:40 ^v 11:27 Diyo 6:69; 11:37; 9:6

³⁷Yaa enuna hi ba, “He valila tomatakai i sawal yaka matana i panana, inoke ga i ola ge nige Lasalo i lalabe ge bahi ni aaliga?”

Yeisu Lasalo I Palutem Yaomala

³⁸Yeisu atena i lomwan nabi al ge i nok i na salaiya. He salai o hi ken tukan labilabiya ge pat bwabwatana etega hi ahe awana hi paankausiya. ³⁹Yaka Yeisu i ba, “Pat ku pakul egonan.”

Yaa Mata, iya Lasalo nuna, i ba, “Babala, iyaka lan esopalena te i kenukenu salaiya. He iyaka bwalena ni gan!”

⁴⁰Yeisu i baek elana i ba, “Tab ya baewa elam ya ba, ‘Ebo nu abulilek-agau inoke Yehoba wana gasisi nu kite?’” ⁴¹Yaka pat toto eteli kaus hi pakul egonan. Yeisu matana i ha labulabumwa inoke i ba, “Ateu owa Nam, kaiwena no awanun iyaka u hago. ⁴²Ya atena sauga gegewena no awanun u hago, yaa ya ba ola o gamagalau bolo hi taltalmilil ya kaiweliya, inoke nihi abulilek te owa u patunau.”

⁴³Sauga Yeisu i baaba haba, yaka i yoga anana i bwata i ba, “Lasalo, u tagilim!” ⁴⁴Yaka i lut i tagil. He valila tuwana ana os kama yayapona hi ahe aena ge nimana hi avan, ge kaliko etega hi ahe maninina hi os.

Inoke Yeisu i baek gamagalau elal i ba, “Ku na tuwana ana os ku leke yoho, inoke ku teli ge ni nawanawa.”

Yudiya wali Tohouwa Hi Nuwanuwatu Yeisu Nihi Lopaaliga

⁴⁵Yudiya bolo hi na Meli elana ge Yeisu wana ginol hi kite, hi gewi hi abulilek elana.^w ⁴⁶Yaa enuna hi na Palisi elal ge Yeisu wana ginol hi wasaan.^x ⁴⁷Inoke topowon bwabwatal avaliyau ge Palisi, Yudiya wali tologugui wali nogogo etega hi yogaan, ge hi ba, “Ga ta ginol ola tau ya kaiwena? He ginol yawiyawi hi gewi i awaawaginol! ⁴⁸Ebo nige bugul etega ta giginol elana ge ginol ololana o ni awaawaginol ya, he nasi gamagalau gegewel nihi abulilek elana. Yaka Loma nihi nem wala Limi Bwabwalena nihi ahe, ge avalau wala gamagalau nihi apapanak-agila.”

⁴⁹Tologugui o avaliya etega alana Kaiyapa, iya baliman o topowon bwabwatal wali tohouwa, i ba masal i ba, “Gewagewa komiu! ⁵⁰Age nige ku aatena kamwasa etega toto eliyana ge bosowaina ni labemiu? I waisi te gamagal maisena ni yaomal gamagalau kaiweliya, ge bahi kila Yudiya gegewela nak ta pwapwawa.”

⁵¹He Kaiyapa nige totona wana nuwatu i oola ge baaba o i baunan. Yaa baliman o iya topowon bwabwatal wali tohouwa, inoke i palopisai te Yeisu abwe ni yaomal boda Yudiya gegewel kaiweliya. ⁵²Ge Yeisu i yaomal nige Yudiya ya kaiweliya i oola, yaa Yehoba natunau gegewel kaiweliya, bolo hi minek labi tomaha ge tomaha elal, inoke ni bugul

^w 11:45 Diyo 7:31 ^x 11:46 Luke 16:31

papahel nihi tabwa boda maisena.^y ⁵³Inoke i telipuna lan o ge i nok, Yudiya wali tohouwa hi nuwanuwatu ga nihi ola ge Yeisu nihi lopaaliga.^z

⁵⁴Inoke nuwatu o kaiwena Yeisu nige i nonomasamasal Yudiya gamwaliyaa, yaa alonau wana tohago hi egon, hi na hi minaa ga panuwa etega alana Ipileimi, iyoho labi kekevana labenaa.

⁵⁵Yudiya wali Nopalegi Hagalena ana sauga iyaka i kelakelaubwa, inoke bolo hi miminek awan ge awan ona elal hi nowanik hi na Yelusalema ali abwabubun paganina kaiwena, mulaa abwe Nopalegi Hagalena ana sauga. ⁵⁶Gamagalau o hi loyaloya Yeisu kaiwena, ge Limi Bwabwalena gamwanaa hi talmilil ge hi pebaaba-agil hi ba, “Ga ku nuwatu ola? Tab nasi ni nem hagali ya elana?” ⁵⁷He topowon bwabwatal avaliyau ge Palisi iyaka logugui hi ginol ge hi ba, “Ebo gamagal etega Yeisu wana abamina ni atena, wama wasa ni pem, inoke naha ba nihi lib ge nihi yowan.”

Meli Enonu I Holek Yeisu Aenaa

(Mataiyo 26:6-13; Mak 14:3-9)

12 ¹Lan sikis ya i mina ge abwe Nopalegi Hagalena ana sauga, inoke Yeisu i na Bedani, awan toto Lasalo i miminaa, iya te Yeisu valila i palutem yaomala.^a ²Aanan etega hi ginol Yeisu kaiwena. Mata aanan i habwe ge i lovilovivina gamagalau kaiweliya, ge Lasalo alonau gamagalau iyoho hi misiyu, avaliya Yeisu hi aanan.^b ³Yaka Meli enonu bwalena waiwaisana ge molana bwabwatana, alana nad, ana bwata i ola lita awalehina, i ahe. Inoke i na i holek Yeisu aenaa, ge abwe kokowana pupunona elana i pwamwagamwaga. Enonu bwalena limi gamwana i kalaopopwi.^c

⁴Yeisu wana tohago avaliya etega alana Yudasa Isikalilyota, iya abwe Yeisu ni wasaan, i ba, ⁵“Binimala enonu ya ta palian, molana mani silba ali gewi tili handeled ta ahe, ge ta pek togulagula elal.” ⁶He nige tage i nuwanuwatu togulagula kaiweliya ge i ba ola o, yaa kaiwena iya tokaoma. Wali mani ana kalopu iya i matahikan, ge sauga i gewi mani i pipikaome totona kaiwena.

⁷Yaka abwe Yeisu i ba, “U pialiyoho ya! Wana nuwatu ni ginol ge tuwau ni abubun nonowe o teliteli kaiwena. ⁸Komiu sauga gegewena alomiyau ya togulagula, yaa nau nige sauga gegewena alomiu i oola.”^d

Topowon Bwabwatal Nuwaliya Lasalo Nihi Lopaaliga

⁹Yudiya boda bwabwatana Yeisu wasana hi hago te iya iyoho Bedani, inoke hi nowanik hi na elana. He nige iya kaiwena ya i oola ge hi nonok,

^y 11:52 Diyo 10:16 ^z 11:53 Diyo 5:18 ^a 12:1 Diyo 11:1,43 ^b 12:2 Luke 10:40

^c 12:3 Luke 7:37-38 ^d 12:8 Log 15:11

yaa nuwaliya al Lasalo, iya Yesu i palutem yaomala, nihi kite. ¹⁰Inoke topowon bwabwatal hi nuwanuwatu tage Lasalo al ge nihi lopaaliga, ¹¹puna kaiwena Lasalo wana lut al kaiwena Yudiya hi gewi hi olak Yesu elana ge hi abulilek-an.^e

Yesu wana Ulutuk Yelusalema I Ola Kin
(*Mataiyo 21:1-11; Mak 11:1-11; Luke 19:28-40*)

¹²Lan i gan al, boda bwabwatana bolo hi nowanik Nopalegi Hagalena kaiwena wasa hi hago Yesu i nanawa Yelusalema. ¹³Inoke vegavega ginebi lamwaliya hi govel ge hi bugulagil hi na Yesu hi kite kamwasaa. Inoke hi nonoyogayoga hi ba,

“Hosana! Babala ta tobalan!”

“Yehoba ni ba muloluan,
iya i nem Babala alana elana!”

“Yehoba ni ba muloluan, iya Isileli wala Kin!”^f

¹⁴Yesu donki etega i ahe i heya pwananaa, i ola Buki Bwabwalena ana baaba i ba:^g

¹⁵Saiyoni gamagaliliyau, bahi lovakun!

Ku kite, wami kin i nenem
eliyamiu, i heya donki natuna elana.

¹⁶Sauga o wana tohago ginol o ana sapu nigeaya ga hi aatena. Yaa Yehoba Yesu i palut ge i pawasawasa enaa, inoke abwe hi nuwatu Buki Bwabwalena ana baaba i ba ola o Yesu kaiwena, ge hi nuwahikan te bugul bolo o hi ginol elana.^h

¹⁷He valila boda bwabwatana Yesu hi kite Lasalo i yogaan ge i palutem yaomala, inoke heliya Yesu wana ginol wasana hi palelu.

¹⁸Gamagalau hi gewi Yesu wana ginol yawiyawi o wasana hi hago, inoke hi nok hi na Yesu hi kite kamwasaa. ¹⁹Inoke Palisi heliya ya hi pebaaba-agil hi ba, “Nuwatu toto ta nuwatu ge tage ta ginol, iyaka nige bosowaila! Ku kite, gamagalau gegewel iyaka hi olak elana ge hi toulil.”

Gilik Gamagaliliyau Enuna Nuwaliya Yesu Nihi Kite

²⁰Bolo hi na Yelusalema Nopalegi Hagalena ana tapwalolo kaiwena, he gamwaliyaa Gilik gamagaliliyau enuna iyoho. ²¹Heliya hi nok hi na Pilipi elana, iya i neem panuwa Betesaida labi Galili gamwanaa, ge hi ba, “Tonowak, nuwama Yesu naha kite.” ²²Yaka Pilipi i nok i na i baek Andulu elana, ge ali toto eluwa hi na Yesu wana wasa hi pek.

²³Inoke Yesu i baek elal i ba, “Sauga iyaka i vin ge Yehoba Gamagal Natuna ni pawasawasa.”ⁱ ²⁴Ya ba tunahot eliyamiu, ebo witi pwanumwina

^e 12:11 Diyo 11:45 ^f 12:13 Same 118:25-26; Diyo 1:49 ^g 12:14 Sak 9:9

^h 12:16 Diyo 2:22 ⁱ 12:23 Diyo 13:31-32; 17:1

etega nige ni sosoguek bilibiliya ge ni aaliga, he ni maimaisena ya. Yaa ebo ni aliga, inoke abwe ni siun ge ni enon, enona ni pohaka ge ni gewi.^j ²⁵Henala ebo yawalina ni nunuwana-an, he abwe ni payaomal. Henala ebo yawalina panayawiya nige ni nunuwana-an, he nige ni papayaomal, yaa ni kukuhikan ana siga yawal mihomihotina ni pwawa.^k ²⁶Ebo gamagal etega nuwana ni tuwalali kaiweu, he ni toulilau, ge ebo hauna labi elana na minaa, iya al ni minaa. Inoke gamagal toto i tuwalali kaiweu alana Nam ni teli heyana.”

Yeisu i Liwaliwan Wana Yaomal kaiwena

²⁷Yaka abwe Yeisu i ba, “Sauga ya yayaluwau i pulowan, ge nige ya aatena ga na ba ola. Age na ba, ‘Nam, bahi lomwan ya ni mamasal eliyau?’ Nige ya, he lomwan ya kaiwena te ya nem.^l ²⁸Nam, alam nu teli heyana ge nu pawasawasa.”

Inoke anan etega i loem labulabumwa i ba, “Alau iyaka ya pawasawasa, ge abwe na pawasawasa al.”

²⁹Sauga gamagalau bolo hi taltalmilil o anan hi hago, yaka enuna hi ba, “Gulumwawa butuna to.” Yaa enuna al hi ba, “Anelose etega to i baaba elana o.”

³⁰Yeisu i baik elal i ba, “Anan toto ku hago, nige nau o labe kaiwena i oola, yaa komiu ami labe kaiwena. ³¹Sauga ya Yehoba panayawi gamagaliliyau wali pagan ni hile ge ali lahi ni baunan; ge sauga al ya Yehoba panayawi ana babala Seitani ni pakokove ge ni tagatagil-an. ³²Yaa nau, sauga ebo nihi teli heyagau kolos elana, inoke gamagalau gegewel na ahel nihi nem elau.”^m ³³He i ba ola o, inoke i pamasal bwaliga ga ni yaomal ola.”

³⁴Yaka boda hi ba masal hi ba, “Ha hago Logugui i ba tage Mesaiya iya ni mihot sauga gegewena. He ga i ola ge owa u ba, ‘Gamagal Natuna abwe nihi teli heyana kolos elana?’ Gamagal Natuna toto bana u baaba, he iya henala?”^o

³⁵Yeisu i baik elal i ba, “Nasi mwananal alomiu sauga kekeisi al ya. Inoke nuku nawanawa sauga mwananal iyehe alomiu, ge bahi gogou ni gogougou-agimiu. Kaiwena toto i nawaa gogouwa nige i aatena te ga i nonoek.^p ³⁶Sauga mwananal iyehe alomiu, nuku abulilek elana, inoke nuku tabwa mwananal natunau.” Sauga Yeisu i baaba haba, yaka i egon i na i bunsumi ge nige hi kikite.^q

Judiya Nige Hi Aabulilek

³⁷Bwagana Yeisu ginol yawiyawi hi gewi i ginolil gamagalau mataliyaa, yaa nige hi aabulilek elana. ³⁸Inoke palopita Aiseya wana baaba i patunahot, toto i ba:

j 12:24 1Kol 15:36 k 12:25 Mat 16:25 l 12:27 Same 6:3; 42:5; Mat 26:38

m 12:32 Diyo 3:14 n 12:33 Diyo 19:6 o 12:34 Same 110:4; Ais 9:7; Dan 7:14

p 12:35 Diyo 8:12 q 12:36 Epe 5:8

Babala, henala wama wasa i abulilek-an?
 Ge henala Babala wana
 gasisi i kite i ola te sauga ya i giginol?^r
³⁹Nige bosowailiya nihi abulilek kaiwena Aiseya i ba al i ba:
⁴⁰Yehoba mataliya i pakai,
 ge wali nuwatu i pagogou,
 inoke nige bosowailiya nihi kite mataliyaa,
 o ebo nuwaliya ni sapu.
 Yehoba i ba, “Nige
 bosowailiya nihi nuwasikal elau ge na pwamolol.”
⁴¹He Aiseya Yeisu wana wasawasa i kite, inoke i baaba Yeisu bana i ola to.^s
⁴²Yaa bwagana, Yudiya wali tohouwa hi gewi hi abulilek Yeisu elana.
 Yaa wali abulilek nige hi babaa tagilan, kaiwena Palisi hi lovakunagil eba
 nihi teli tagilagil wali limi tapwalolowa ge bahi avaliyau nihi tatapwalolo
 al wali boda elana.^t ⁴³Nuwaliya te alaliya gamagalau nihi teli heyen,
 nige nuwaliya Yehoba alaliya ni teli heyen.^u

Baaba Bolo Yeisu I Baunan Gamagalau Ni Payatalal

⁴⁴Yeisu i baaba anana i bwata i ba, “Henala ebo ni abulilek elau,
 nige i aabulilek nau ya elau, yaa i abulilek al toto i patunau elana.
⁴⁵Henala ebo ni kiteyau, he toto i patunau iyaka i kite al.”^v ⁴⁶Nau ya nem
 panayawiya ya ola mwananal, inoke bolo hi abulilek elau, gegewel nige
 nihi miminaa gogouwa.
⁴⁷“Ebo gamagal etega no baaba i hago ge nige i hehenapu-an, he nau
 nige na papayatala, kaiwena ya nem nige tage gamagalau panayawi na
 payatalal, yaa na pwamwalil.”^w ⁴⁸Henala ebo o en ni pem ge no baaba
 ni towani, he iyaka ana toyatala i gan. Baaba bolo ya baunan te bwaliga
 ni payatala sauga mowamowasena elana. ⁴⁹He i ola to, kaiwena nige ya
 babaa totou no nuwatu elana, yaa Nam toto i patunau o logugui i pem
 ga na ba ola ge hauna baaba na baunan. ⁵⁰Ge ya atena Nam wana baaba
 yawal mihomihotina i pamasal. Inoke baaba gegewena bolo ya baunan,
 he i ola te Nam i baunanim ge na baunan.”

Yeisu wana Tohago Aeliya I UI

13 ¹Nopalegi Hagalena ana sauga iyaka i kelaubwa hot. Yeisu i
 atena te wana sauga iyaka i vin ge panayawi toto ya ni eguluwai
 ge ni sikal ni na Tamana elana. Wana gamagalau bolo hi minaa
 panayawiya i nunuwana-agil, inoke i nunuwana-agil nabiyen i na ana
 siga wana yaomal elana.

^r 12:38 Ais 53:1 ^s 12:41 Ais 6:1 ^t 12:42 Diyo 9:22 ^u 12:43 Diyo 5:44

^v 12:45 Diyo 14:9 ^w 12:47 Diyo 3:17

²Yeisu alonau ge wana tohago heliya iyoho kokoyavi enona hi aanan. Seitani nuwatu iyaka i paulutuk-an Yudasa Isikaliyota Saimon natuna elana ge Yeisu ni wasaan.^x ³He Yeisu i atena te Tamana gasisi ge bugul gegewena i teli nimanaa, ge i atena iya i neem Yehoba elana ge ni sikal al Yehoba elana.^y ⁴Inoke aanan i lut luwan, ana kama toto yayapona i loho i teli, ge tawel i ahe i lataavan henuwaninaa. ⁵Yaka wewel i holek mwaha etega elana, inoke i telipuna tohago aeliya i ulul ge tawel toto i lataavana henuwaninaa i ahe i pwapwamwagamwaga.

⁶Sauga i ul vin Saimon Pita elana, yaka Pita i nel i ba, “Babala, nasi aeu nu ul?”

⁷Yeisu Pita anana i lahe i ba, “Sauga ya hauna gun ya awaawaginol ana sapu nige u aatena, yaa bwaliga abwe nu atena.”

⁸Pita i ba, “Bahiwa! Bahi sauga etega aeu nu uul.”

Yaka Yeisu i ba, “Ebo nige aem na uul, he nige al nu oola no tohago.”

⁹Saimon Pita i ba, “Babala, ebo i ola o, he bahi aeu ya nu uul, yaa nimwau ge kokowau al nu ulil.”

¹⁰Yeisu i ba, “Ebo gamagal etega ni highig, he tuwana bikena gegewena iyaka i mowasi. Inoke nige ni highig al, besena ya te aena ni ul. Komiu iyaka ku yanayana, yaa nige gegewemiu hot i oola.”^z ¹¹He Yeisu iyaka i atena te henala abwe ni wasaan, heiya te kaiwena i ba, “Nige gegewemiu hot ku yanayana.”

¹²Sauga tohago aeliya i ulil haba, yaka ana kama yayapona i ahe i galoi al, inoke i na i misiyo al abanaa. Yaka i nel wana tohago elal i ba, “Tab ku atena hauna gun abwe ya ginol eliyamiu? ¹³Komiu ku awa topankite-agau ge ku awa babala-agau, he ku ba bubun tei, kaiwena nau ya ola to. ¹⁴He nau wami Babala ge wami Topankite aemiu iyaka ya ul, inoke komiu al alomiyau aeliya nuku ul.”^a ¹⁵Wami abagagayawa iyaka ya ginol, inoke nuku ginol ni ola no ginol eliyamiu.^b ¹⁶Ya ba tunahot eliyamiu, totuwalali nige wana babala i bwabwata lake, ge elopapatuna nige ana topapatuna i bwabwata lake.^c ¹⁷No ginol puna hot ana sapu iyaka ku atena, ge ebo nuku ginol ola, inoke ana yaliyaya nuku pwawa.

¹⁸Yaa baaba toto ya baunan, nige gegewemiu bamii i oola. He bolo ya hilel ya atenal. Yaa Buki Bwabwalena ana baaba ni tunahot, toto i ba, “Tau toto alou ha anan mwaha maisena elana, iya iyaka i pihigelgel elau.”^d ¹⁹He wami wasa ya pewa pahuwala te, inoke sauga ebo ginol o ni masal, yaka nuku abulilek te ‘Nau heiya te Nau.’^{e f} ²⁰Ya ba tunahot

^x 13:2 Luke 22:3; Diyo 13:27 ^y 13:3 Diyo 3:35; 16:28 ^z 13:10 Diyo 15:3; 6:64,70-71

^a 13:14 Mat 20:28; Luke 22:27 ^b 13:15 Pilp 2:5; Kols 3:13; 1Pit 2:21 ^c 13:16 Mat 10:24

^d 13:18 Same 41:9 ^e 13:19 Diyon 8:24 ana epwamwananal paiya nu kite.

^f 13:19 Diyo 14:29; 16:4

elijamiau, henala ebo bolo ya patunal ni atupahel, he i atupaheyau, ge henala ebo i atupaheyau, he toto i patunau i atupahe al.”^g

Tohago Avaliya Etega Abwe Yeisu Ni Wasaan
(*Mataiyō 26:20-25; Mak 14:17-21; Luke 22:21-23*)

²¹Sauga Yeisu i ba ola o, inoke yayaluwana i pulowan nabi, yaka i ba masal ya i ba, “Ya ba tunahot elijamiau, komiu etega abwe ni wasaagau.”

²²Tohago mataliya hi peluwaluwan-an avaliyau elal, nuwaliya i gewagewa nige hi aatena henala bana ge Yeisu i babaa. ²³He Yeisu wana tohago avaliya etega, toto i nunuwana-an nabiyā,^h i misiyowa Yeisu labenaa. ²⁴Saimon Pita matana i nok tohago o elana, inoke awana i palamwalamwaniu-ek elana tage Yeisu ni neli henala ge bana i babaa.

²⁵Inoke tohago o i gena nok Yeisu elana ge i nel i ba, “Babala, henala bana?”

²⁶Inoke Yeisu i ba, “Nasi beleid awahinena na paululowan mwaha gamwanaa na pahun ge na pek elana. He gamagalina iya.” Yaka beleid i pahun ge i pek Yudasa Isikaliyota Saimon natuna elana. ²⁷Sauga Yudasa beleid i ahe, inoke sauga o Seitani i ulutuk elana.

Yaka Yeisu i baek elana i ba, “Bugul toto tage u giginol, he etimwawa nu ginol.”ⁱ ²⁸Yaa tohago bolo hi misiyōan abaanā elana, nige hi aatena hauna kaiwena ge Yeisu i ba ola o Yudasa elana. ²⁹Yudasa iya wali mani ana kalopu i matahikan, inoke tohago enuna wali nuwatu tage Yeisu i baek elana ni nok ni na bugul enuna ni pwamola hagali kaiwena, o ebo mani enuna ni pek togulagula elal. ³⁰Sauga Yudasa beleid i ahe i an, yaka sauga o i tagil ge i egon. He bulin iyaka i gan.

Logugui Vavaluna

³¹Yudasa i egon enaa, yaka Yeisu i ba, “Sauga ya Gamagal Natuna wana wasawasa gamagalau nihi kite, ge iya eliyana Yehoba wana wasawasa al nihi kite.”^j ³²He iya eliyana te Yehoba wana wasawasa nihi kite, inoke Yehoba totona Gamagal Natuna ni pawasawasa, ge etimwawa ni ginol ola.^k

³³“Natuwau, nige alowau komiu ta miminabi. He abwe nuku loyaagau, yaa sauga ya na ba elijamiau ni ola te valila ya baek Yudiya wali tohouwa elal: ‘Nige bosowaimiu nuku noek labi toto ya nonoek.’^l ³⁴Logugui vavaluna sauga ya na pewa: nuku penununuwana-agimiu. He nuku penununuwana-agimiu ni ola nau ya nunuwana-agimiu.”^m ³⁵Ebo nuku penununuwana-agimiu, inoke eliyana gamagalau gegewel nihi atena age komiu no tohago.”

^g 13:20 Mat 10:40 ^h 13:23 Tabam Diyon toto buki ya ana toleleli totona bana te i ba, “Yeisu wana tohago toto i nunuwana-an nabiyā.” ⁱ 13:27 Diyo 13:2 ^j 13:31 Diyo 2:23
^k 13:32 Diyo 17:5 ^l 13:33 Diyo 7:33-34 ^m 13:34 Diyo 15:12,17; 1Diy 3:23; 2Diy 5

Pita Abwe Yeisu Ni Alahan Paeton

(*Mataiyo 26:31-35; Mak 14:27-31; Luke 22:31-34*)

³⁶Saimon Pita i nel Yeisu elana i ba, “Babala, ga u nonoek?”

Yeisu i ba, “Nige bosowaim sauga ya nu toulilau ge nu noek labi toto nau ya nonoek, yaa bwaliga abwe nu toulilau.”

³⁷Inoke Pita i baik elana i ba, “Babala, ga i ola ge nige bosowaina sauga ya na touliliwa? Ya talamwagau na yaomal kaiwem.”

³⁸Yaka anana Yeisu i lahe i ba, “Tunahot u talamwagiwa nu yaomal kaiweu? Ya ba tunahot eliyam, nasi nu alahagau paeton, mulaa abwe kamkam melutauina ni kahin.”

Yeisu Iya Kamwasa ge Abanok Tamana elana

14 ¹Yeisu i baik wana tohago elal i ba, “Bahi atemiu ni bwanabwana! Nuku melteli Yehoba elana ge nuku melteli al elau. ²Nam wana limi elana abamina i gewi, inoke na nok ge abamiu na lovivina-an. Binimala ebo nige abamina, he nige bosowaina na ba ola to. ³Sauga ebo na nok ge abamiu na lovivina-an haba, yaka abwe na sikalim na ahemiu alowau komiu, inoke ebo ga na minaa, komiu al nuku minaa.” ⁴Labi toto ya nonoek ana kamwasa ku atena ya.”

⁵Tomas i baik elana i ba, “Babala, nige ha aatena te ga u nonoek, he abwe kamwasa ge naha atena ola?”

⁶Inoke anana Yeisu i lahe i ba, “Nau kamwasa, ba tunahot ge yawal. Nige bosowaina etega ni noek kamwasa getoga elana ge ni nok Nam elana, iyai te nau elau.” ⁷Binimala ebo nuku atenau bubun, he inoke Nam al nuku atena. Sauga ya elana ge ta nanawa awolaa Nam iyaka ku atena ge iyaka ku kite.”^p

⁸Inoke Pilipi i ba, “Babala, Tamwam u pankitema, yaka wama nuwatu ni paolaolaek.”

⁹Yeisu i baik Pilipi elana i ba, “Pilipi, age nige u aatenau, bwagana alowau komiu iyaka ta minabi? Henala ebo i kiteyau, he iyaka Nam i kite. Inoke ga i ola ge u ba, “Tamwam u pankitema?”^q ¹⁰Age nige u aabulilek te nau ya minaa Nam elana ge Nam i minaa elau? Baaba bolo ya baunan eliyamiu nige totou no nuwatu i oola. Yaa Nam iya i minaa elau ge wana tuwalali i awaawaginol.” ¹¹No baaba nuku abulilek-an te, toto ya ba, ‘Nau ya minaa Nam elana ge Nam i minaa elau.’ Yaa ebo baaba ya nige ku aabulilek-an, he tuwalali bolo ya ginolil kaiweliya inoke nuku abulilek.”^s ¹²Ya ba tunahot eliyamiu, henala ebo ni abulilek elau, he iya ginol bolo ya ginolil abwe ni ginolil. Ge ginol bwabwatal ni ginolil, ginol bolo iyaka

ⁿ 14:3 Diyo 12:26 ^o 14:6 Diyo 11:25; Loma 5:1-2 ^p 14:7 Diyo 8:19 ^q 14:9 Diyo 12:45; Kols 1:15; Hib 1:3 ^r 14:10 Diyo 12:49 ^s 14:11 Diyo 10:38

ya ginolil ni bwata lakel, kaiwena nau ya nana Nam elana.^t ¹³Ge hauna ebo nuku awanuni alau elana, na ginol ni ola wami awanun. Inoke no ginol o elana Nam alana na teli heyan ge na pawasawasa.^u ¹⁴Hauna gun ebo nuku awanuni alau elana, nasi na ginol.”

Yeisu I Baaba Yayaluwa Bwabwalena Bana

¹⁵Yeisu i ba, “Ebo nuku nunuwana-agau, inoke no logugui nuku henapuan.” ¹⁶Na awanun Nam elana inoke Tolabe etega al ni pewa, ge iya alomiu sauga gegewena.” ¹⁷Tolabe o, iya Yayaluwa toto Yehoba ana aatena tutunahotina i pamasal. Gamagalau panayawi nige bosowailiya nihi ahe ali tolabe, kaiwena nige hi kikite ge nige hi aatena. Yaa iya komiu ku atena, kaiwena komiu alomiu ge i minaa eliyamiu.^x ¹⁸Nige na eeguluwagimiu ni oola mwawamwawas, yaa abwe na nem al eliyamiu. ¹⁹Sauga kekeisi abwe gamagalau panayawi nige nihi kikiteyau al, yaa komiu nuku kiteyau. Kaiwena nau yawaliu i gan, inoke komiu al yawalimiu ni gan. ²⁰Lan toto o elana abwe nuku atena nau ya minaa Nam elana, ge komiu ku minaa elau, ge nau ya minaa eliyamiu.^y ²¹Henala ebo no logugui ni ahe ge ni henapuan, he iya te i nunuwana-agau. Toto i nunuwana-agau, Nam gamagal o i nunuwana-an, ge nau al ya nunuwana-an ge totou na pamasalau elana.”

²²Yaka Yudasa (nige toto Yudasa Isikaliyota i oola) i ba, “Babala, ga i ola ge nu pamasaliwa eliyama ge nige nu papamasaliwa gamagalau panayawi elal?”

²³Anana Yeisu i lahe i ba, “Ebo etega ni nunuwana-agau, no panpankiti ni henapuan. Yaka Nam gamagal o ni nunuwana-an, inoke alou Nam naha nok elana ge aloma naha mina. ²⁴Toto ebo nige i nunuwana-agau, he nige no panpankiti ni hehenapu-an, inoke nige naha mamasal elana. He panpankiti toto ku hago nige totou no nuwatu i oola, yaa i neem Nam toto i patunau elana.^z

²⁵“Baaba bolo ya ya baunan eliyamiu sauga nau iyehe alowau komiu. ²⁶Yaa Tolabe, Yayaluwa Bwabwalena, iya alau elana abwe Nam ni patunam, inoke bugul gegewena ni pankitemiu ge baaba gegewena bolo ya baunan eliyamiu ni panuwahikagimiu.

²⁷“Nuwa laumwal ya eeguluwan eliyamiu; no nuwa laumwal ya pewa eliyamiu. Nuwa laumwal lolana o nige bosowaina panayawi ni pewa te nau na pewa. Bahi atemiu ni bwanabwana ge nuku lolovakun. ²⁸Iyaka ku hago te ya ba, ‘Ya eegon yaa abwe na sikalim al eliyamiu.’ Binimala nuku nunuwana-agau, he nuku yaliyaya te ya nana Nam elana, kaiwena iya i

^t 14:12 Mak 16:19-20 ^u 14:13 Mat 7:7; Diyo 15:16 ^v 14:15 Diyo 15:10;

1Diy 5:3 ^w 14:16 Diyo 14:26; 15:26; 16:7 ^x 14:17 Diyo 16:13 ^y 14:20 Diyo 17:21-23

^z 14:24 Diyo 7:16

bwata lakeyau.^a ²⁹Wami wasa ya pewa pahuwala te mulaa abwe bugul bolo o ni gan, yaka sauga ebo ni gan inoke nuku abulilek.^b ³⁰Iyaka sauga nige i yayapu ge tage alowau komiu ta liwaliwan al, kaiwena panayawi ya ana babala Seitani iyoho i nenem. Nige wana gasisi i gagan elau, ³¹yaa ya talamwagau kaiwena nuwau panayawi nihi atena te Nam ya nunuwana-an ge wana logugui gegewena i baunan eliyau ya ginolil. Ku nem, labena ya ta eguluwai.”

Yeisu I Ba, “Nau Oine Puna”

15 ¹“Nau oine hot puna, ge Nam iya toeyowa. ²Lala bolo hi siuna eliyau ge nige hi eenon, gegewel ni gotomwa yohil, yaa lala gegewel bolo hi enon ni abubunil, laliya bolo hi nak ni tomwa yohil, inoke nihi enon nabi.^c ³Komiu iyaka ku waisi kaiwena baaba bolo ya baunan eliyamiu iyaka i abubunimiu. ⁴Nuku minaa eliyau, inoke nau na minaa eliyamiu. Nige bosowaina lala etega totona ni enon ebo nige ni miminaa puna elana. I ola al komiu nige bosowaina nuku enon ebo nige nuku miminaa eliyau.

⁵“Nau oine puna ge komiu lalana. Henala ebo ni minaa elau, ge nau na minaa elana, iya ni enon nabi. Yaa ebo nuku miluwagau, nige bosowaina bugul etega nuku ginol. ⁶Henala ebo nige ni miminaa elau, iya i ola lala toto hi aliyoho ge i yakiwa. Lala lolana o hi bugul papahe inoke hi yoho tukan ginahaa ge nihi kalas.^d ⁷Ebo nuku minaa elau ge no baaba ni minaa eliyamiu, bugul bolo nuwamiu nuku awanun kaiweliya, inoke nuku pwawa. ⁸Ebo nuku enon nabi ge nuku ola no tohago, he toto ya Nam ni pawasawasa.^e

⁹“Nau ya nunuwana-agimiu, i ola ya te Nam i nunuwana-agau. He nuku minaa no nunuwana gamwanaa. ¹⁰Ebo no logugui nuku henapuan, inoke nuku minaa no nunuwana gamwanaa, ni ola nau Nam wana logugui ya henapuan ge ya minaa wana nunuwana gamwanaa.^f ¹¹Baaba ya ya baunan eliyamiu inoke no yaliyaya ni mina eliyamiu ge wami yaliyaya ni pakalaopop. ¹²He no logugui iya hiwe: nuku penununuwana alomiyau elal ni ola nau ya nunuwana-agimiu.^g ¹³Nige gamagal etega wana nunuwana ana bwata ni oola toto yawalina i talamwan wana heliyamwau kaiweliya.^h ¹⁴Ebo nuku ginol ni ola no logugui, he komiu no heliyamwau.ⁱ ¹⁵Nige al na aawa totuwalali-agimiu, kaiwena totuwalali nige i aatena te wana tonowak hauna i giginol. Yaa nau ya awa heliyamwau-agimiu, kaiwena bugul gegewena bolo ya hagoem Nam elana iyaka ya pamasal eliyamiu. ¹⁶Komiu nige ku hihileyau, yaa nau ya hilemiu nuku nok nuku na nuku enon, ge enomiu o ni

^a 14:28 Diyo 20:17 ^b 14:29 Diyo 13:19 ^c 15:2 Mat 3:10 ^d 15:6 Mat 7:19; 13:42

^e 15:8 Mat 5:16 ^f 15:10 Diyo 14:15; 1Diy 2:5 ^g 15:12 Diyo 13:34 ^h 15:13 Diyo 10:11; 1Diy 3:16 ⁱ 15:14 Mat 12:50

mihot. Inoke hauna gun ebo nuku awanuni alau elana, Nam ni pewa. ¹⁷He no logugui iya hiwe: nuku penununuwana-agimiu.”^j

Gamagalau abwe Tohago Nihi Pihigelgel-agil

¹⁸Yeisu i ba, “Ebo panayawi gamagaliliyau nihi pihigelgel-agimiu, nuku nuwahikan te hi pihigelgel-agau houwan. ¹⁹Binimala ebo nuku minek panayawi gamagaliliyau ali boda elana, inoke nihi nunuwana-agimiu ni ola komiu avaliyau. Yaa komiu nige ku miminek ali boda elana, nau ya hilemiwa gamwaliyaa. Inoke heiya te kaiwena panayawi gamagaliliyau hi pihigelgel-agimiu.^k ²⁰Baaba toto ya baunan eliyamiu nuku nuwahikan i ola hiwe: ‘Totuwalali nige wana babala i bwabwata lake.’ Ebo hi palopalomwan-agau, he komiu al ge nihi palopalomwan-agimiu. Ebo no baaba hi henapuan, he komiu al ge wami baaba nihi henapuan.^l ²¹Nau kaiweu pagan ya nihi ginol eliyamiu, kaiwena toto i patunau nige hi aatena. ²²Binimala nige na nenem ge wali wasa na pepeke, he nige ali woliwoli ni gagan wali gegi kaiwena. Yaa sauga ya nige wali epaepakuna i gagan wali gegi kaiwena. ²³Toto ebo i pihigelgel-agau, he i pihigelgel al Nam elana.^m ²⁴Ginol ololal nige sauga etega gamagal etega i giginol, nau ya ginol gamwaliyaa. Binimala nige ya, inoke nige ali woliwoli ni gagan wali gegi kaiwena. He ginol yawiyawi ya ginolil iyaka hi kite, yaa bwagana o, alou ge Nam hi pihigelgel-agima. ²⁵I masal i ola to inoke baaba toto wali Logugui ana buki gamwanaa i patunahot, toto i ba, ‘Hi pihigelgel-agau bwabwage nige wali puna i gagan.”ⁿ

²⁶“Abwe Tolabe ni nem, iya Yayaluwa toto Yehoba ana aatena tutunahotina ana topamasal ge i tagilem Nam elana. Iya na patuna eliyamiu ni neem Nam elana ge wasau ni wasaan.^o ²⁷Yaa komiu al ge wasau nuku wasaan, kaiwena i telipunaa sauga toto tuwalali ya telipuna, alowau komiu ya.

16 ¹“Baaba ya ya baunan eliyamiu ni pagasisi-agimiu ge bahi nuku sosogu. ²Bwaliga abwe nihi ba nuku tagil wali limi tapwalolowa ge nige alomiyau nuku tatapwalolo al. Ge sauga i nenem, ebo gamagal etega ni tagapaaligamiu, he i nuwatu tage Yehoba wana tuwalali to i ginol o.^p ³Ginol ololana o nihi ginol eliyamiu kaiwena nige alou ge Nam hi aatenama.^q ⁴Baaba ya ya baunan eliyamiu, inoke ebo ana sauga ni vin, no baaba ya nuku nuwahikan. He valila nige wami wasa ya pepewa houwan bugul ya kaiweliya, kaiwena nau iyoho ya eliyamiu.”

Yayaluwa Bwabwalena wana Tuwalali

⁵“He sauga ya ya eegon ya nana toto i patunau elana. He komiu nige etega ku nenelau te ga ya nana, ⁶yaa atemi i lomwan no baaba o kaiwena. ⁷Yaa ya

j 15:17 Diyo 13:34 k 15:19 Diyo 17:14 l 15:20 Diyo 13:16 m 15:23 Luke 10:16

n 15:25 Same 35:19; 69:4 o 15:26 Diyo 14:26 p 16:2 Mat 24:9; Luke 6:22; Diyo 9:22

q 16:3 Diyo 15:21

ba tunahot eliyamiu: wami waisi kaiwena te nau ya eegon, kaiwena ebo nige na eegon, Tolabe nige ni nenem eliyamiu. Yaa ebo na egon, inoke abwe na patuna ni nem eliyamiu.⁷ ⁸Ge sauga ni nem, panayawi gamagaliliyau wali gegi ni pankitel, ge ni pankitel henala i sapu, ge ni pankitel Yehoba abwe ni payatalal ge ali lahi ni baunan. ⁹Wali gegi ni pankitel, kaiwena nige hi aabulilek elau. ¹⁰Ni pankitel henala i sapu, kaiwena nau ya nonok ya nana Nam elana, he nige al nuku kikitayau. ¹¹Ge ni pankitel Yehoba abwe ni payatalal, kaiwena panayawi ya ana babala Seitani iyaka i payatala ge ana lahi i baunan.⁵

¹²“Bugul i gewi nabi iyoho nuwau na baunan eliyamiu, yaa eba nige bosowaimiu i oola.[†] ¹³Yaa sauga Yayaluwa toto Yehoba ana aatena tutunahotina ana topamasal ni nem, iya ni nulimiu ge baaba tutunahotina gegewena nuku atena. He nige totona wana nuwatu ni babaunan, yaa toto i hago ya te ni baunan, ge bugul bolo hi gagan sauga mulaa ni pamasal eliyamiu. ¹⁴Iya nuwatu ni ahem elau ge ni pamasal eliyamiu, inoke eliyana alau ni pawasawasa. ¹⁵Bugul gegewena toto Nam elana, he nau eliyau. Heiya te kaiwena ge ya ba Yayaluwa Bwabwalena ni ahiahiya eliyau ge ni papamasal eliyamiu.”

Sauga Ya Atemiu I Lomwan, Yaa Abwe Nuku Yaliyaya

¹⁶Yeisu i ba vevehe al i ba, “Sauga kekeisi abwe nige nuku kikitayau, yaa sauga kekeisi al abwe nuku kiteyau.”^u

¹⁷Wana tohago enuna hi pebaaba-agil hi ba, “Wana baaba ana sapu ga i ola toto i ba, ‘Sauga kekeisi abwe nige nuku kikitayau, yaa sauga kekeisi al abwe nuku kiteyau?’ Ge i ba al, ‘Nau ya nana Nam elana.’” ¹⁸Heliya iyoho hi pepenelnel-agil hi ba, “Ana sapu ga i ola ge i ba, ‘Abwe sauga kekeisi?’ Wana baaba ana sapu kila nige ta aatena.”

¹⁹Yeisu i atena te wana tohago nuwaliya nihi nel elana, yaka i baek elal i ba, “Bi ola ge ku penelnel-agimiu no baaba ana sapu kaiwena, toto ya ba, ‘Sauga kekeisi abwe nige nuku kikitayau, yaa sauga kekeisi al abwe nuku kiteyau?’

²⁰Ya ba tunahot eliyamiu, abwe nuwamiu ni nak ge nuku kahin, yaa panayawi gamagaliliyau nihi yaliyaya. Lomwan nuku pwawa, yaa wami lomwan abwe ni pil ni na yaliyaya elana. ²¹Ebo yova wana sauga ab, lomwan i pwawa, kaiwena wana sauga iyaka i vin. Yaa sauga ebo wawaya iyaka i sogu, inoke wana lomwan nige al i nunuwahikan, kaiwena i yaliyaya te wawaya iyaka i masal panayawi. ²²I ola al sauga ya komiu atemiu i lomwan, yaa abwe na kitemiu al ge nuku yaliyaya, ge nige gamagal etega wami yaliyaya ni aahek yoho. ²³Lan o elana nige bugul etega nuku neneli elau. Ya ba tunahot eliyamiu, hauna gun ebo nuku awanuni alau elana, Nam ni pewa.^v ²⁴Valila ge i nem ana siga sauga ya, nige alau elana bugul etega ku aawanuni. He nuku awanun, inoke nuku pwawa ge yaliyaya nuku kalaopopwi.”

^r 16:7 Diyo 14:16 ^s 16:11 Diyo 12:31 ^t 16:12 1Kol 3:1-2 ^u 16:16 Diyo 14:19

^v 16:23 Mat 7:7

Yeisu Panayawi Wana Gasisi I Pakokove

²⁵Yeisu i ba vevehe al i ba, “No baaba eliyana ya ba kakanun ya. Yaa sauga i nenem abwe nige al na babaa kakanun eliyamiu, yaa Nam kaiwena na ba hoti ya. ²⁶He sauga o alau elana nuku awanun. Nige ya babaa ola te tage kaiwemi u na awanun Nam elana, ²⁷kaiwena Nam totona i nunuwana-agimiu. I nunuwana-agimiu kaiwena komiu ku nunuwana-agau ge ku abulilek te nau ya neem Yehoba elana.” ²⁸Nau ya neem Nam elana ge ya lau panayawi; he sauga ya panayawi ya eeguluwai ge ya sisikal Nam elana.”

²⁹Yaka wana tohago hi ba, “He sauga ya iyaka u ba hoti te, nige ba kakanun i oola. ³⁰He iyaka ha kite te bugul gegewena u atena. Nige tage gamagal etega ni nel ga eliyam ge abwe wana nel nu lahe. He toto o i paabulilek-agima te owa u neem Yehoba elana.”

³¹Yeisu i baek wana tohago elal i ba, “Iyaka abwe ku abulilek sauga e? ³²Ana sauga iyoho i nenem, he iyaka i vin, ge abwe gegewemi nuku liliwaliwali nuku na tomaha ona wami panuwaa, ge maiseu ya nuku eguluwagau. Yaa nige maiseu ya i oola, kaiwena alou Nam.”^x

³³“Nuwau nuku atilaumwal kaiwena ku minaa eliyau, heiya ge kaiwena baaba bolo ya ya baunan eliyamiu. Abwe palopalomwan nuku pwawa panayawi elana. Yaa atemi u ni matuwa, kaiwena panayawi wana gasisi iyaka ya pakokove.”^y

Yeisu I Awanun Iya Totonai kaiwena

17 ¹Yeisu baaba bolo ya i baunan haba, yaka matana i lihin labulabumwa ge i ba, “Nam, sauga iyaka i vin. Natum nu pawasawasa, inoke Natum ni pawasawasa-agiwa. ²Kaiwena gasisi u pek elana gamagalau gegewel ni logugui-agil, inoke bosowaina yawal hot ni pek gamagalau gegewel elal bolo u pek elana. ³Ge yawal hot iya te owa Yabowaine tutunahotina maisem nihi atenawa, ge Yeisu Keliso iya u patuna nihi atena.”^z ⁴Iyaka alam ya pawasawasa panayawiya, kaiwena tuwalali toto u pem ge na ginol, iyaka ya pwamowasi.”^a ⁵Nam, he nuwau sauga ya alou owa ta mina ge alau nu pawasawasa, ni ola te valila alou owa ta minaa wasawasa o elana mulaa abwe panayawi i gan.”^b

Yeisu I Awanun wana Tohago kaiweliya

⁶Iyaka ya pamasaliwa gamagalau elal, bolo u aheliya panayawi ge u pem elau. He heliya wam gamagalau ge abwe u pem elau. Inoke wam baaba hi henapuan, ⁷ge iyaka hi atena te bugul gegewena bolo u pem

^w 16:27 Diyo 14:21,23 ^x 16:32 Mat 26:31,56 ^y 16:33 Diyo 14:27; Loma 5:1; 1Diy 5:4
^z 17:3 1Diy 5:20 ^a 17:4 Diyo 4:34 ^b 17:5 Diyo 1:1

elau hi neem elam. ⁸Baaba bolo u pem eliyau iyaka ya baunan eliyalil, he iyaka hi hago ge hi yaliyaya-an. Inoke hi atena te tunahot nau ya neem elam, ge hi abulilek-an te owa u patunau.

⁹Ya awanun kaiweliya. Nige ya aawanun panayawi gamagaliliyau kaiweliya, yaa bolo u pem elau kaiweliya, kaiwena heliya wam gamagalau. ¹⁰No gamagalau gegewel heliya wam gamagalau, ge wam gamagalau gegewel heliya al no gamagalau. Ge gamagalau ya elal gamagalau panayawiya no wasawasa hi kite. ¹¹He nau ya nonowa elam. Nige na miminaa al panayawi, yaa heliya nihi miminaa ga panayawi. O Nam Bwabwalena, alam wana gasisi elana nu matahikagil—he alan o iyaka u pem elau—inoke nihi tabwa maisena ni ola owa ge nau kila maisena. ¹²Sauga alowau ha mina, alam wana gasisi elana ya matahikagil, he alan o iyaka u pem elau. Ya nolibulibu-agil, inoke nige etega i yayaomal, iyai ya te tau toto nuwana yaomal, inoke Buki Bwabwalena ana baaba i patunahot.^c

¹³Nau ya nonowa eliyam, yaa sauga nau iyehe panayawi, no awanun o ya baunan, inoke no yaliyaya ateliya ni kalaopopwi. ¹⁴Wam baaba ya baunan eliyalil, inoke panayawi gamagaliliyau hi pihigelgel-agil, kaiwena nige hi miminek panayawi gamagaliliyau ali boda elana, i ola nau nige ya miminek ali boda elana. ¹⁵Ya awanun nige tage nu aheliya panayawi, yaa nu nolibulibu-agil Seitani elana.^d ¹⁶Heliya nige hi miminek panayawi gamagaliliyau ali boda elana, i ola nau nige ya miminek panayawi ali boda elana. ¹⁷Wam baaba i tunahot, inoke nuwau wam baaba tutunahotina ni tuwalaliya elal ge eliyana nu pwabwabwalena-agil wam tuwalali kaiwena. ¹⁸Ya patunal hi tagil panayawi i ola u patunau ya nem panayawi.^e ¹⁹Heliya kaiweliya ya pwabwabwalena-agau elam, kaiwena nuwau heliya al nihi bwabwalena hot elam.

Yeisu I Awanun Bolo Abwe Nihi Abulilek kaiweliya

²⁰Nige ya aawanun ya te bolo ya kaiweliya, yaa ya awanun al bolo tohago ya wali wasa eliyana ge abwe nihi abulilek elau kaiweliya. ²¹Ya awanun te heliya gegewel nihi tabwa maisena. O Nam, nihi minaa eliyala ni ola te owa u minaa elau ge nau ya minaa elam. Nihi tabwa maisena inoke panayawi gamagaliliyau nihi abulilek-an te owa u patunau. ²²Iyaka u pawasawasa-agau, inoke wasawasa o eliyana nau iyaka ya pawasawasa-agil, inoke heliya nihi tabwa maisena ni ola owa ge nau kila maisena.^f ²³Nau ya minaa elal ge owa u minaa elau, inoke ginol o eliyana nuwau heliya nihi tabwa maisena hot. Yaka panayawi nihi atena te owa u patunau ge bolo o u nunuwana-agil i ola u nunuwana-agau.

^c 17:12 Diyo 6:39; 13:18 ^d 17:15 Mat 6:13; 2Tes 3:3 ^e 17:18 Diyo 20:21

^f 17:22 Tuw 4:32

²⁴Nam, bolo u pem elau, nuwau alowau naha mipamaisena labi toto nau na minaa, inoke no wasawasa nihi kite. He wasawasa o u pem elau kaiwena u nunuwana-agau mulaa abwe panayawi i gan.

²⁵Nam, Tosasapona hot owa, panayawi nige hi aatenawa, yaa nau ya atenawa, ge bolo u pem elau iyaka hi atena te owa u patunau. ²⁶Iyaka ya pamasaliwa elal, ge na ginol hikahikani, kaiwena nuwau nihi penununuwana-agil ni ola owa u nunuwana-agau, ge nuwau al na minaa elal.”

Yudasa alonau Tolohaveyan Hi Nok Yesu kaiwena
(*Mataiyo 26:47-56; Mak 14:43-50; Luke 22:47-53*)

18 ¹Yesu i awanun haba Tamana elana, yaka alonau wana tohago hi egon hi na sinawel Kidilon hi kalapanet-an ge hi na hi ha labena etega. He ebwakil olibe ana gungun etega iyoho labi o elana, inoke alonau wana tohago hi na hi tuk gamwanaa. ²Yudasa toto Yesu i wasaan labena o i atena bubun, kaiwena sauga i gewi Yesu alonau ge wana tohago hi nana hi mimigogo labi o elana. ³Inoke Yudasa alonau tolohaveyan ali boda etega, avaliyau ge Limi Bwabwalena ana pulisimanau enuna, bolo topowon bwabwatal ge Palisi hi patunal, hi nok hi na gungun o elana. He elikaya, odam ge elohaveyan hi noahel.

⁴Yesu iyaka i atena te hauna nasi ni gan elana, yaka i pulinok elal ge i ba, “Henala ge ku loyaan?”

⁵Anana hi lahe hi ba, “Yesu gagama Nasaleta.”

Yaka Yesu i ba, “Nau te.” (He Yudasa toto Yesu i wasaan iyoho to alonau i taltalmilil.) ⁶Sauga Yesu i ba, “Nau te,” inoke hi talsikal ge hi sogu bilibiliya.

⁷Yesu i nelil al i ba, “Henala ge ku loyaan?”

Yaka hi ba, “Yesu gagama Nasaleta.”

⁸Inoke analiya i lahe i ba, “He iyaka ya ba haba eliyamiu, nau te. Ebo ku loyaagau, inoke alowau bolo ya nuku piluwagil ge nihi egon.” ⁹I ba ola o, inoke wana baaba i tabwa tunahot, toto i ba, “Nam, bolo u pem elau nige etega ya papayaomal.”^g

¹⁰Saimon Pita wana elohaveyan kilepana i gan, inoke i kukuyagin abanaa ge topowon bwabwatal wali tohouwa wana totuwalali tanana toto labena awonaa i goyoho. Tau o alana Malkas. ¹¹Yaka Yesu i baek Pita elana i ba, “Wam elohaveyan kilepana u teli pasikal abanaa. U nuwatu lomwan ana kom toto Nam i pem bahi na iim?”^h

Yesu Hi Pwatanik Anasa elana

¹²Tolohaveyan ali boda avaliya wali tologugui, avaliyau ge Yudiya wali pulisimanau, Yesu hi lib. Inoke hi yowan ¹³ge houwan hi pwatanik

^g 18:9 Diyo 17:12 ^h 18:11 Mat 26:39

Anasa elana. Anasa iya Kaiyapa yawana, Kaiyapa lagona tamana. Kaiyapa iya topowon bwabwatal wali tohouwa baliman o elana. ¹⁴He Kaiyapa te i baek Yudiya wali tologugui elal i ba, “I waisi te gamagal maisena ni yaomal gamagalau kaiweliya.”ⁱ

Pita Wana Alaha Houwan

(Mataiyo 26:69-70; Mak 14:66-68; Luke 22:55-57)

¹⁵Saimon Pita alona ge tohago etega al’ Yeisu hi noulil. Tohago toto o iya ana aatena i gan topowon bwabwatal wali tohouwa elana. Inoke iya alona Yeisu hi na hi tuk topowon bwabwatal wali tohouwa wana bakubakuwa, ¹⁶yaa Pita i notalmilila bakubaku ana nog elana. Yaka tohago toto ana aatena i gan topowon bwabwatal wali tohouwa elana, i sikal i na i ba yova toto nog ana tomatahikan elana ge abwe Pita i en tukan.

¹⁷Inoke yova toto nog ana tomatahikan i baek Pita elana i ba, “Age owa al tau o wana tohago etega?”

Yaka Pita i ba, “Nigeya, nau nige i oola.”

¹⁸Panuwa i tultul, yaka totuwalali ge pulisimanau ginaha hi ton ge hi milipainan hi loloamwaligu. Inoke Pita i nok i na alonau hi talmilil ge hi amwaligu.

Topowon Bwabwatal wali Tohouwa Yeisu I Neli

(Mataiyo 26:59-66; Mak 14:1-8; Luke 3:1-18)

¹⁹Topowon bwabwatal wali tohouwa Yeisu i neli wana tohago kaiweliya ge wana panpankiti al kaiwena.

²⁰Yaka Yeisu i ba, “Sauga gegewena ya baaba mwananala gamagalau elal. Ya panpankitiya limi tapwalolo ona elal ge Limi Bwabwalena elana, heliya Yudiya gegewel wali abamimigogo. Nige baaba etega ya babaa sume. ²¹Inoke hauna kaiwena ge u nelau? Bolo no baaba hi hago nu nelil. Heliya no baaba gegewena hi atena.”

²²Sauga Yeisu i ba ola o, yaka pulisiman etega toto i talmilila gegelinaa, Yeisu gegenana i taganepal ge i ba, “Hauna kaiwena ge u ba lahi topowon bwabwatal wali tohouwa elana i ola o?”

²³Yaka Yeisu i ba, “Ebo baaba etega ya ba panak, nu baunan gamagalau gegewel nihi hago. Yaa ebo ya ba bubun, he hauna kaiwena ge u taganepalau?” ²⁴(He ewasi Anasa Yeisu alona ge ana eyowan iyaka i patuna i nem Kaiyapa elana, iya topowon bwabwatal wali tohouwa.)

ⁱ 18:14 Diyo 11:49-51 ^j 18:15 Tabam Diyon toto buki ya ana toleleli totona bana te i ba, “Tohago etega al.”

Pita wana Alaha Paeluwana ge Paetonina
(*Mataiyo 26:71-75; Mak 14:69-72; Luke 22:58-62*)

²⁵Saimon Pita iyoho i taltalmilil ge i amwaamwaligu, inoke gamagal etega i baik elana i ba, “Age owa al tau o wana tohago etega?”

Yaka i alaha i ba, “Nigeya, nau nige i oola.”

²⁶Topowon bwabwatal wali tohouwa wana totuwalali etega, iya tau toto tanana Pita i gogoyoho tutuna, i baik Pita elana i ba, “Owa heiya ya kitewa alom Yeisu olibe ana gungun gamwanaa, age?” ²⁷Yaka Pita i alaha al, ge sauga o elana kamkam melutauina i kahin.^k

Yeisu I Talmilil Pilato Matanaa
(*Mataiyo 27:1-2,15-31; Mak 15:1-20; Luke 23:1-5,13-30*)

²⁸Yudiya Yeisu hi ahe Kaiyapa wana limiya, ge hi en pwatanik Loma wali gavana Pilato wana limiya. Sauga o iyaka mweluluga lan i gangan. Nige hi tutuk gavana wana limiya, kaiwena ebo ni pabikel ge nige bosowailiya Nopalegi Hagalena enona nihi an. ²⁹Yaka Pilato i na i tagil Yudiya elal ge i nelil i ba, “Tau ya hauna gegi i ginol ge kaiwena ku wole?”

³⁰Anana hi lahe hi ba, “Binimala nige gegi etega ni giginol, he nige naha een pwatanim elam.”

³¹Pilato i ba, “He ku ahe ku na ku pakot totomiu wami logugui elana.”^l

Yaka Yudiya hi ba, “Yaa komiu Loma wami logugui nige i tatalam te tage ama Yudiya gamagal etega ana logugui naha ginol ge naha ba ni aliga.” ³²He i masal i ola to, inoke Yeisu wana baaba ni tabwa tunahot, toto valila i baunan ge i pamasal hauna kaba yaomal elana ni yaomala.^{m n}

³³Pilato i sikal i na limi gamwanaa, yaka Yeisu i yogaan ge i neli i ba, “Owa Yudiya wali kin?”

³⁴Yeisu i baik elana i ba, “Baaba toto u baunan totom wam nuwatu, o age gamagalau enuna wasau hi baunaniwa?”

³⁵Pilato Yeisu anana i lahe i ba, “Age u nuwatu nau Yudiya gamagalina, ine? Wam panuwa gamagaliliyau avaliyau ge wali topowon bwabwatal te hi ahewa ge hi telewa nimwawa. Hauna u ginol panak?”^o

³⁶Yeisu i ba, “No abalogugui nige i miminaa panayawi ya elana. Binimala ebo ni ola, he awau toabinau nihi lut nihi lohoveyan kaiweu, ge bahi Yudiya nihi yoyowanau. Yaa nigeya, no abalogugui nige i miminaa labena ya elana.”

^k 18:27 Diyo 13:38 ^l 18:31 Diyo 19:6-7 ^m 18:32 He Diyon 12:32 ge 33 nu kite. Binimala Yudiya wali logugui eliyana ge ni yaomala, he nihi loipati. Yaa Loma wali kamwasa te gamagalau bolo hi lalahel nihi lokolosagil. ⁿ 18:32 Diyo 3:14; 12:33 ^o 18:35 Diyo 1:11

³⁷Pilato i ba, “Oo, he age owa kin!”

Anana Yeisu i lahe i ba, “He totom te u ba, ‘Owa kin.’ Nuwatu toto kaiwena ge nain i abau ya nem panayawiya i ola hiwe: baaba tutunahotina na wasaan gamagalau elal. Gamagalau gegewel bolo hi minek baaba tutunahotina elana anau hi hago.”

³⁸Inoke Pilato i nel i ba, “He baaba tutunahotina hauna kaba bugul?”

Yaka i na i tagil al Yudiya elal ge i ba, “Nige ana woliwoli puna etega ya pwapwawa ge tage ana lahi na baunan. ³⁹He ku atena te baliman maisena ge maisena, Nopalegi Hagalena ana sauga elana, toulutuk dela etega na sokal kaiwemi ge ni tagil. Tab nuwamiu komiu Yudiya wami kin na sokal kaiwemi?”

⁴⁰Anana hi lahe hi yoga hi ba, “Nige ya, iya nige i oola! Ama nuwama Balabas!” Yaa Balabas iya totaulol ge tokaoma.

Pilato Yeisu I Talamwan ge Ni Yaomal

(*Mataiyo 27:26-31; Mak 15:15-26; Luke 23:24-25*)

19 ¹Inoke Pilato i ba toloveyan Yeisu hi ahe ge hihii elololina elana hi nibinibihan. ²Yaka pepesala hi ahe hi ginol ana hanahana ge hi teli kokowanaa. Kaliko yayapona matana pepol i ola kin ali kaliko, hi ahe ge hi pagaloi,^p ³yaka hi nonok elana ge hi babaa, “Atema owa, Yudiya wali kin!” Inoke gegenana hi tataganepal.

⁴Pilato i na i tagil al boda elal ge i ba, “Ku laegan! Na en tagilan nuku kite, inoke nuku atena te nige ana woliwoli puna etega ya pwapwawa ge tage ana lahi na baunan.” ⁵Inoke Yeisu i notagil, ana hanahana pepesala iyoho kokowanaa, ge kaliko yayapona matana pepol i galoi iyoho tuwanaa. Yaka Pilato i ba, “Ku kite! Tauina iya hiwe!”

⁶Sauga topowon bwabwatal ge wali pulisimanau Yeisu hi kite, yaka hi yoga hi ba, “U lokolosan! U lokolosan!”

Pilato analiya i lahe i ba, “Totomiu ku ahe ku na ku lokolosan. Nau nige ana woliwoli puna etega ya pwapwawa ge tage ana lahi na baunan.”

⁷Inoke Yudiya Pilato anana hi lahe hi ba, “Ama wama logugui etega i gan, ge logugui o i ba ni yaomal, kaiwena i ba tage iya Yehoba Natuna.”

⁸Sauga Pilato baaba o i hago, yaka i lovakun nabi hot. ⁹Inoke i na i tuk al wana limi gamwanaa ge Yeisu i neli i ba, “He owa ga u neem?” Yaa Yeisu nige Pilato anana i lalahe.^q ¹⁰Yaka Pilato i ba, “Nige nuwam nu baem elau? Tab u atena no gasisi i gan bosowai na sokaliwa o ebo na ba nihi lokolosagiwa?”

¹¹Yaka Yeisu i ba, “Binimala Yehoba nige gasisi ni tatalamwan elam, he nige wam gasisi ni gagan ge nu lologugui-agau. Inoke bolo hi talamwagau nimwamwa, heliya wali gegi wam gegi i bwata lake.”^r

^p 19:2 Luke 23:11 ^q 19:9 Mat 27:12 ^r 19:11 Diyo 10:18; Tuw 2:23; Loma 13:1

¹²Sauga o elana Pilato kamwasa i loya ge Yeisu ni sokal. Yaa Yudiya hi ganyogayoga hi ba, “Ebo tau ei nu sokal, he nige Sisa wana heliyam i oola owa. Henala ebo totona i ba iya kin, iya i pihigelgel Sisa elana.”^s

¹³Sauga Pilato Yudiya wali baaba o i hago, inoke Yeisu i en tagilan noleleya, yaka Pilato i misiyo topapayatata wali abamisiyowa, abamisiyo o i minaa limi bebena etega alana hi ba, “Bwalal Pat.” He alana pana Hibilu hi ba, “Gabata.” ¹⁴Lan o Nopalegi Hagalena ana lan lovivina, ge sauga o iyaka kelaubwa alalati bwagatau.

Yaka Pilato i baek Yudiya elal i ba, “Wami kin iya hiwe.”

¹⁵Yudiya hi yoga hi ba, “U ahe u egonan! U ahe u egonan! U na u lokolosan!”

Pilato i nelil i ba, “Nuwamiu wami kin na lokolosan?”

Topowon bwabwatal anana hi lahe hi ba, “Nige wama kin etega al i gagan, iyai ya te Sisa maisena.”

¹⁶Yaka Pilato Yeisu i talamwan elal ge nihi lokolosan.

Yeisu Hi Lokolosan

(Mataiyo 27:32-44; Mak 15:21-32; Luke 23:26-43)

Inoke toloveyan Yeisu hi ahe. ¹⁷Totona ana kolos hi pakalivai ge i tagil panuwa tolinaa i na labi toto hi ba “Pana Babaloma.” (He pana Hibilu hi ba “Goligota.”) ¹⁸Inoke hi lokolosana to. Gamagalau labui alonau hi lokolosil, etegana ana kolos hi pamilila labena awonaa, ge etegana labena gegebanaa, yaa Yeisu i minaa luwaluwala.

¹⁹Pilato leleli etega i ginol ge i ba hi tagahikan Yeisu ana kolos elana. Leleli i ba, “Yeisu gagama Nasaleta, Yudiya wali kin.” ²⁰Yudiya hi gewi leleli o hi vasili, kaiwena labi toto Yeisu hi lokolosana nige ana bwaga i yayapu panuwa bwabwatana elana, ge leleli o hi leli pana Hibilu, pana Loma ge pana Gilik elana. ²¹Yudiya wali topowon bwabwatal hi nok hi na Pilato elana hi ba, “Binimala bahi nu leleli ola te, ‘Yudiya wali kin.’ Ya nu leli te, ‘Tau ya i ba: Nau Yudiya wali kin.’”

²²Pilato analiya i lahe i ba, “Leleli toto iyaka ya leli, he iyaka ya leli.”

²³Sauga toloveyan Yeisu hi lokolosan haba, yaka ana kaliko hi ahe ge hi wali, he teli wali ana gewi esopali, toloveyan maisena ge maisena tomaha ona ali kaliko. Ana holahola awaa al hi ahe, ge hi kite kaliko maisena ya te elana hi ginoliya, ge nige ana hel tubwi i gagan. ²⁴Inoke hi ba, “Bahi ta kukuleleli-an. He pat ta ahe ta galavenu-an, inoke henala ebo pat toto ana etotohi gaganina ni ahe, he ta pek elana.” Hi ginol ola o, inoke Buki Bwabwalena ana baaba hi patunahot, toto i ba:

“O kaliko hi wali hi guyauan elal,
ge pat hi galavenu-an ge

^s 19:12 Luke 23:2; Tuw 17:7

nih i kite henala o kama ni ahe.”

He tolohavyan wali ginol i ola to.^t

²⁵Yeisu hinana alona talina, avaliyau Meli toto Kolopas lagona ge Meli Magidala yovana, hi talmilil ana kolos gegelinaa.^u ²⁶Yeisu matana i nok hinana i kite, ge tohago toto i nunuwana-an nabiyani i talmilil gegelinaa, yaka i baik hinana elana i ba, “Nevenak, natum tei.”^v ²⁷Yaka i baik al tohago elana i ba, “Hinam tei.” Inoke sauga o tohago nevenak i ahe, i na i matahikan wana limiya.

Yeisu wana Yaomal

(*Mataiyo 27:45-56; Mak 15:33-41; Luke 23:44-49*)

²⁸Yeisu i atena wana tuwalali gegewena iyaka i mowasi, inoke Buki Bwabwalena ana baaba ana patunahot kaiwena i ba, “Ya walem.”^w ²⁹Oine manumanunina ana patuna etega iyoho to. Balou hi ahe hi pahun oine manumanunina elana i vinum, yaka hisopa lana etega hi ahe balou hi howa, inoke hi paelu heyani Yeisu hohopenaa.^x ³⁰Sauga i im, yaka i ba, “Iyaka i mowasi.” Inoke kaununa i pwabun lowan, yaka yawalina i talamwan i mowasi.

Yeisu Luluna Hi Howa

³¹Lan o Sabwata ana lan lovivina, ge lan ni gan Sabwata bwabwatana alana gaganina etega. Yudiya nige nuwaliya Yeisu ge alonau tuwaliya ni kukukiya kolos elana ge Sabwata ni pwawa, inoke hi na hi awanun Pilato elana ge ni ba tolohavyan Yeisu ge alonau aeliya nihi tagagabom,^y ge tuwaliya nihi bugul lowan.^z ³²Yaka tolohavyan hi nok hi na gamagalau bolo avaliya Yeisu hi lokolosagil, etegana aena hi tagagabom, yaka abwe hi na labuina al aena hi tagagabom. ³³Yaa sauga hi nok Yeisu elana, hi kite yawalina iyaka i mowasi, inoke aena nige hi tatagagabom. ³⁴Yaa tolohavyan etega gau i ahe Yeisu luluna i howa, yaka etimwawa saliya ge wewel i sani tagil. ³⁵Tau toto bugul ya i kite i gan,^a iya i wasaan, ge wana wasa i tunahot. I atena wana baaba i tunahot, ge iya i wasa inoke komiu nuku abulilek.^b ³⁶Bugul ya i gan inoke Buki Bwabwalena ana baaba i patunahot, toto i ba, “Nige tutuwana etega ni mwamwagabom.”^c ³⁷Ge Buki Bwabwalena ana baaba etega al i ba, “Toto hi howa nihi gayawaan.”^d

Yeisu Tuwana Hi Teli Salaiya

(*Mataiyo 27:57-61; Mak 15:42-47; Luke 23:50-56*)

³⁸Bugul ya i mowasi, yaka Yosepa gagama Alimadiya i na Pilato elana Yeisu tuwana ni patalam. He Yosepa iya Yeisu wana tohago etegana,

^t 19:24 Same 22:18 ^u 19:25 Mat 27:55-56 ^v 19:26 Diyo 13:23 ^w 19:28 Same 22:15

^x 19:29 Same 69:21 ^y 19:31 Aeliya nihi tagagabom inoke etimwawa yawaliliya ni mowasi. ^z 19:31 Log 21:22-23 ^a 19:35 Diyon totona bana te i ba, “Tau toto bugul ya i kite i gan.” ^b 19:35 Diyo 21:24 ^c 19:36 Tota 12:46; AlGe 9:12; Same 34:20

^d 19:37 Sak 12:10; Pan 1:7

yaa i tohago sumi, kaiwena Yudiya wali tologugui i lovakunagil. Pilato i talam, yaka i nok i na Yesu tuwana ni ahe. ³⁹Nikodimas alona Yosepa hi nok, Nikodimas toto valila bulin gamwana i nok i na Yesu i kite. Iya enonu bwalena waiwaisana, meya alona ge alos hi vikuhu, i noahe, ana pulowan i ola teti kiloglem (30 kg).^e ⁴⁰Heliya Yesu tuwana hi ahe, enonu bwalena waiwaisana o elana hi paenonu, yaka kaliko waiwaisana ge yayapona hi ahe tuwana hi avan. He hi ginol i ola to, i ola Yudiya wali yaomal ana teliteli paganina. ⁴¹Labena toto Yesu hi lokolosana, eyowa etega i minaa to. Eyowa o gamwanaa salai etega hi ken tukan, salai o i vavaluna ge nige ya ga gamagal etega i kekenuwa. ⁴²Lan o Yudiya wali lan lovivina, yaka lan ni gan lan Sabwata, ge salai o i mikelaubwa. Inoke Yesu tuwana hi kalivai hi na hi teliya to.

Salai Enoenovana

(*Mataiyo 28:1-8; Mak 16:1-8; Luke 24:1-12*)

20 ¹Wik ana lan houwan elana mweluluga kekeisi, panuwa nige ya ga i mwamwananal, yaka Meli Magidala yovana i na salaiya, inoke i kite pat toto salai awana ana epaankaus iyaka hi pakul egonan. ²Yaka i patalelu sikal i na Saimon Pita ge tohago toto etega elal, tohago toto Yesu i nunuwana-an nabiyon.^f Inoke i ba, “Babala tuwana iyaka hi ahe salaiya, ge nige ha aatena te ga hi teliya!”

³Inoke Pita alona ge tohago toto etega hi egon nihi na salaiya. ⁴Ali toto eluwa hi patalelu, yaa tohago toto etega alona i patalelu luwai, i na i vin houwa salaiya. ⁵I imowan tuk, ge kaliko toto Yesu tuwana ana os i kite, yaa nige i tutuk. ⁶Saimon Pita mulaa abwe i vin, yaka i tatahot i na i tuk salaiya. Kaliko toto Yesu tuwana ana os iyoho i kite abanaa, ⁷ge i ola al kaliko toto kokowana ana os i kite. Nige i miminaa tuwan ana os elal, yaa ana awa i ola te gamagal etega i gagabom ge i teli getogaan. ⁸Yaka tohago toto etega, toto i vin houwa salaiya, mulaa abwe i tuk al, inoke i kite ge i abulilek. ⁹(He Buki Bwabwalena ana baaba ana sapu nige ya ga hi aatena, toto i ba Yesu abwe ni lutem yaomala.)^g ¹⁰Yaka tohago hi sikal hi na wali limiya.

Yesu I Masal Meli Magidala Yovana elana

(*Mataiyo 28:9-10; Mak 16:9-11*)

¹¹Meli iyoho i taltalmilil salai tolinaa i kahikahin. I kahikahin gamwanaa inoke i imowan tuk salaiya, ¹²yaka aneloseyau labui i kitel kaliko yayanana hi galoi, hi misiyowa toto Yesu tuwana i kenukenuwa. Etegana i minaa kokowana abanaa, ge etegana i minek aena abanaa.

^e 19:39 Diyo 3:1-2 ^f 20:2 Diyon 13:23 ana epwamwananal paiya nu kite.

^g 20:9 Tuw 2:24-32; 1Kol 15:4

¹³Inoke hi neli hi ba, “Yova, hauna kaiwena ge u kahikahin?”

Yaka analiya i lahe i ba, “No Babala tuwana iyaka hi ahe egonan, he nige ya aatena te ga hi teliya.”

¹⁴Sauga i ba ola o, yaka i tagena sikal ge i kite Yeisu i taltalmilil, yaa nige i aatena te age iya Yeisu.^h ¹⁵Yaka Yeisu i nel elana i ba, “Yova, hauna kaiwena ge u kahikahin? Henala u loloyaan?”

Meli i nuwatu tage eba iya toeyowa, yaka i baik elana i ba, “Tonowak, ebo no Babala tuwana u kalivai egonan, he no wasa u pem ga u teliya, inoke na nok na na na ahe.”

¹⁶Yeisu i baik elana i ba, “Meli!”

Yaka Meli i milil pil, ge i pana Hibilu i ba, “*Laboni!*” (Baaba ya ana sapu heiya “topankite.”)

¹⁷Yeisu i baik elana i ba, “Bahi nu pipihikagau ge nu kukuhikagau! Kaiwena nigeya ga ya sisikal ya haha Nam elana. Yaa u nok u na taliwau elal ge wali wasa nu pek te, ‘Ya sisikal ya nana Nam ge komiu Tamamiu elana, no Yabowaine ge wami Yabowaine elana.’”ⁱ ¹⁸Inoke Meli Magidala yovana i nok i na i baik tohago elal i ba, “Babala iyaka ya kite.” Ge baaba toto Yeisu i baunan elana i wasaan elal.

Yeisu I Masal wana Tohago elal

(*Mataiyo 28:16-20; Mak 16:14-18; Luke 24:36-49*)

¹⁹Lan toto o, iya wik ana lan houwan, sabwelu iyaka i lobek ge bulin i gan, he tohago heliya iyoho hi mipamaisena limi etega elana, ge ana nog hi loka kaus, kaiwena Yudiya wali tologugui hi lovakunagil. Inoke Yeisu i na i tuk i talmilil gamwaliyaa, yaka i ba, “Atemiu ni laumwal!”²⁰ Baaba o i baunan enaa, yaka nimana ge luluna i pankitel. Sauga tohago Babala hi kite, inoke hi yaliyaya nabi.^j

²¹Yeisu i ba vevehe al i ba, “Atemiu ni laumwal! Komiu na patunamiu nuku nok, ni ola nau Nam i patunau ge ya nem.”²² Baaba o i baunan, yaka i yana yohoe tohago elal ge i ba, “Yayaluwa Bwabwalena ku ahe.²³ Ebo gamagalau wali gegi Yehoba matanaa nuku nuwayoho, he Yehoba iyaka i nuwayoho; ebo gamagalau wali gegi nige nuku nunuwayoho, he Yehoba nige ni nunuwayoho.”^k

Yeisu I Masal Tomas ge Alonau elal

²⁴Sauga Yeisu i masal wana tohago elal, he tohago bolo ali gewi elulutega eluwa avaliya etega alana Tomas (iya alana etega al te Didimas)^l nige i miminaa alonau elal. ²⁵Yaka wana pan tohago wana wasa hi pek hi ba, “Babala ha kite.”

^h 20:14 Luke 24:16; Diyo 21:4 ⁱ 20:17 Loma 8:29; Hib 2:11-12 ^j 20:20 Diyo 16:22; 1Diy 1:1 ^k 20:23 Mat 16:19 ^l 20:24 Didimas ana sapu heiya “gamaluwaluwa.”

Yaka Tomas i baik elal i ba, “Ebo nige ana nel mulina na kikite nimanaa ge nimwau gigina na teteliya mul o eliyana, ge ebo nige nimwau na teteliya lulunaa, ana gau mulina gamwanaa, he nige na aabulilek.”

²⁶Wik maisena i mowasi, tohago heliya iyoho limi gamwanaa, avaliya ge Tomas. Nog hi loka kaus, yaa Yeisu i na i tuk i talmilil gamwaliyaa ge i ba, “Atemiu ni laumwal!” ²⁷Inoke i baik Tomas elana i ba, “Nimwau u kitel ge nimwam gigina nu teliya hiwe. Yaka nimwam nu paelu ge nu teliya luluwa o gau mulina gamwanaa. Bahi al nuwa eleluwa, yaa nu abulilek.”

²⁸Tomas i baik elana i ba, “No Babala ge no Yabowaine!”

²⁹Yaka Yeisu i baik elana i ba, “U kiteyau inoke abwe u abulilek? He bolo nige hi kikiteyau ge hi abulilek, Yehoba ni muloluagil.”^m

Buki Ya ana Nuwatu Hot

³⁰Yeisu ginol yawiyawi hi gewi al i ginolil wana tohago mataliyaa, yaa nige leli tukanina i gagan buki ya gamwanaa. ³¹He wasa bolo ya lelana i gan inoke nuku abulilek te Yeisu iya Mesaiya, Yehoba Natuna, ge wami abulilek o kaiwena iya alana elana yawalimiu hot nuku pwawa.”

Yeisu I Masal wana Tohago elal Talbwasiya

21 ¹Sauga etega al Yeisu i masal al wana tohago elal Hoga Taibeliyas^o ana talbwasiya. He i gan i ola hiwe. ²Saimon Pita, Tomas (iya alana etega al Didimas), Nataniyel (iya gagama Kena Galili awanina), Sebedi natunau eluwa avaliyau ge tohago eluwa al hi mipamaisena. ³Saimon Pita i baik alonau elal i ba, “Nau ya nana ya logi.”^p

Yaka heliya hi ba, “Ha nonowa aloma owa.” Inoke hi nok hi na hi gaiha wagaa, ge hi na hi logi matavi, yaa bulin o nige moti etega hi loge.

⁴Mweluluga sabwelu i haha, Yeisu i na i talmilil talbwasiya, yaa tohago nige hi aatena te iya Yeisu. ⁵Inoke i yoga nok elal i ba, “Alowau, tab moti etega ku loge?”

Anana hi lahe hi ba, “Nigeya.”

⁶Yaka i baik elal i ba, “Wami vineya ku alipaloek waga bebena toto nimamiu labena awomiu elana, inoke moti enuna nihi ona.” Inoke vineya hi alipalo hogaa, ge nige bosowailiya nihi momol pahe waga gamwanaa, kaiwena moti hi gewi nabi hi ona.

⁷Yaka Yeisu wana tohago toto i nunuwana-an nabiyau,^q i baik Pita elana i ba, “Babala to!” Sauga Saimon Pita i hago tohago o i ba, “Babala to,” inoke ana kaliko toto i loho i teli, i ahe i galoi, i supeni lau hogaa ge

^m 20:29 1Pit 1:8 ⁿ 20:31 Diyo 3:15; Loma 1:17; 1Diy 5:13 ^o 21:1 Diyon 6:1 nu kite.

^p 21:3-6 Luke 5:4-7 ^q 21:7 Diyon 13:23 ana epwamwananal paiya nu kite.

i gayutuk.^r ⁸Tohago gegewel al waga elana abwe hi gotuk, ge vineya hi gomomol moti hi kalaopop gamwanaa, kaiwena nige ali bwaga i gagan datuwa, ana yapu tabam wan handeled mita ya. ⁹Sauga hi gotuk ge hi gailau, ginaha hi kite ge moti enuna iyoho ginaha kiyalina gamwanaa, ge beleid enuna al hi kite. ¹⁰Yaka Yesu i baek elal i ba, “Moti bolo abwe ku logel enuna ku pwatanim.”

¹¹Yaka Saimon Pita i na i ha wagaa, inoke vineya i momol tukan datuwa. Moti bwabwatal hi kalaopop vineya gamwanaa, ali gewi 153. He bwagana moti ali gewi i ola o, yaa vineya nige i mamalabu.^s ¹²Yesu i baek elal i ba, “Ku nem ku anan.” He nige bosowailiya tage etega ni nel elana ni ba, “Henala owa,” kaiwena iyaka hi atena te iya Babala. ¹³Inoke Yesu i nok i na beleid i ahe i pek elal, ge i ginol i ola al to moti elana. ¹⁴He Yesu wana lut al enaa, wana masal paetonina te wana tohago elal.^t

Yesu I Baek Pita elana, “No Sipi Nu Matahikagil”

¹⁵Sauga hi anan haba, yaka Yesu i baek Saimon Pita elana i ba, “Saimon Diyon natuna, tab u nunuwana-agau nabiyani, ge bolo ya wali nunuwana i bwata lake?”

Pita i ba, “Ibwe, Babala, u atena te ya nunuwana-agiwa.”

Yaka Yesu i baek elana i ba, “No sipi natunau nu paanil.”

¹⁶Yesu i ba paeluwana i ba, “Saimon Diyon natuna, tab u nunuwana-agau nabiyani?”

Pita i ba, “Ibwe Babala, u atena te ya nunuwana-agiwa.”

Yaka Yesu i baek elana i ba, “No sipi nu matahikagil.”^u

¹⁷Yesu i nel paetonina Pita elana i ba, “Saimon Diyon natuna, tab u nunuwana-agau?”

Pita atena i lomwan kaiwena Yesu i nel paetonina i ba, “Tab u nunuwana-agau?” Yaka i ba, “Babala, owa bugul gegewena u atena. U atena te ya nunuwana-agiwa.”

Yaka Yesu i baek elana i ba, “No sipi nu paanil. ¹⁸Ya ba tunahot eliyam, wam sauga heval totom am belet u gimwan ge u nok labi toto nuwam nu noek. Yaa bwaliga ebo nu liki, nimwam nu latahin inoke gamagal etega ni yowaniwa ge ni nuliwa nu nok labena toto nige nuwam nu noek.” ¹⁹Yesu i ba ola o ge i pamasal bwaliga Pita hauna kaba yaomal elana ni yaomala ge Yehoba alana ni pawasawasa. Inoke i baek Pita elana i ba, “U toulilau!”^v

²⁰Pita i tagena sikal ge tohago toto etega, toto Yesu i nunuwana-an nabiyani, i kite i noulilem eliyaa. (He iya te valila aanan ana sauga elana i gena nok Yesu elana ge i ba, “Babala, henala ge ni wasaagiwa?”)^w

^r 21:7 Mat 14:29; Diyo 13:23 ^s 21:11 Luke 5:6 ^t 21:14 Diyo 20:19,26

^u 21:16 Tuw 20:28 ^v 21:19 Mat 16:24-25; 2Pit 1:14 ^w 21:20 Diyo 13:23-25

²¹ Sauga Pita tohago o i kite, inoke i nel Yeisu elana i ba, “Babala, yaa tau ya nasi ga ni ola?”

²² Anana Yeisu i lahe i ba, “Binimala ebo nuwau iya ni mina ana siga na sikalim al, he ga i ola elam o? Owa nige wam labi i oola to. Owa u toulilau.” ²³ Yaka wasa kakawi etega i lelu Yeisu ana tototoulil gamwaliyaa tage tohago toto o nige ni yayaomal. Yaa Yeisu nige i babaa ola te nige ni yayaomal. Yaa iya i ba, “Binimala ebo nuwau iya ni mina ana siga na sikalim al, he ga i ola elam o?”

²⁴ Tohago toto ya iya te bugul bolo ya i wasaan ge i leli lowan buki ya gamwanaa. Ge ta atena iya wana wasa i tunahot.^x

²⁵ Yeisu bugul hi gewi nabi al i ginolil. Binimala ebo maisena ge maisena leli lowanina ni gan, he ya nuwatu panayawi nige i bwabwata ge buki bolo nihi leli o abana ni gan.^y a

^x 21:24 Diyo 19:35 ^y 21:25 Diyo 20:30